

MATIW

Yeisuw delen (Luk 3:23-38)

- 1** ¹ Buk towen waseg delen Yeisuw Kelis, tabun kweiboug Deibid, kweiboug tonen tabun Ebelam.
- ² Ebelam natun Aysak. Aysak natun Yekob. Yekob nitun Yud siney tuwan budan.
- ³ Yud nitun Peles son Selak. Ines Temal. Peles natun Eslon. Eslon natun Alam.
- ⁴ Alam natun Amminadab. Amminadab natun Nason. Nason natun Salmon.
- ⁵ Salmon natun Bowas. Bowas inan yagan Leyab. Bowas natun Obed. Obed inan yagan Lut. Obed natun Desiy.
- ⁶ Desiy natun Deibid, mtowen king. Deibid natun Solomon. Solomon inan mtowen Uliyak nakwav. Deibid bo ikow vin manawen.
- ⁷ Solomon natun Lekoboum. Lekoboum natun Ebiy. Ebiy natun Esap.
- ⁸ Esap natun Yosepat. Yosepat natun Yolam. Yolam natun Usay.
- ⁹ Usay natun Yotam. Yotam natun Akas. Akas natun Esekay.
- ¹⁰ Esekay natun Manas. Manas natun Emon. Emon natun Yosiyak.
- ¹¹ Yosiyak nitun Yekonay siney budan, tutan ikoulups ineis Babilon.
- ¹² Ineis Babilon ikous, Yekonay natun Salatiyel. Salatiyel natun Delububel.
- ¹³ Delububel natun Ebiyud. Ebiyud natun Ilayakim. Ilayakim natun Esol.
- ¹⁴ Esol natun Sadok. Sadok natun Ekim. Ekim natun Eliyud.
- ¹⁵ Eliyud natun Eliyesal. Eliyesal natun Mattan. Mattan natun Yekob.
- ¹⁶ Yekob natun Yosep, mtowen Meliy namwan. Meliy natun Yeisuw, mtowen yagan Kelis.
- ¹⁷ Yeisuw delen, tasilamaw Ebelam waseg, tavin Ebelam, tayuwein Ebelam natun, tatounun Ebelam tabun, tawasan Ebelam tabun natun, beibus ee... tutan Deibid waseg, babiweis sinawatan teivas. Tasilamaw Deibid waseg, tavin Deibid son natun, tatounun Deibid tabun, tawasan

Deibid tabun natun, beibus ee... tutan min-Babilon ikawes inawes wasiven, babiweis sinawatan teivas. Tasilamaw tutan ineis Babilon tavin ee... tutan Kelis waseg, babiweis sinawatan teivas.

Apwaw Yeisuw Kelis

(Luk 2:1-7)

¹⁸Nakabsilamaw Yeisuw Kelis māwan. Inan Meliy nibokes vāgan beivays son Yosep. Nag imasis son, tage bo isum-wan; Kululuwan Yowbad isek Meliy mo isum.

¹⁹Namwan Yosep ikin neisum, itilikon, idok kid bipiyev. Taw towen tadidumwal, nag bilivan wavtakon ven; adok vin beivag anmwasin; misinaka bikayeb binoun.

²⁰Ininuway māwan ee... imasis, anmikon waseg Yowbad nataḡayob ikin neim, idibek, ilana, “Yosep, ḡakoum Deibid tabun yak, bweina kuvays soum Meliy. Awoum beivag nanoum babaw. Yowbad Kululuwan isek mo isum ikakudapom.

²¹“Iḡaw mo bikop natun kudataw; e, kudok yagan Yeisuw, mtowen bikatinabwes nagamag sinap kalbaleb waseg.” ²²Youd towen ikamat peinan Yowbad anilivan māwan. Napalopit kweiboug nilivnek mamagina:

²³“Nakubukwab iḡaw naptabod mo bikop natun kudataw, yagan bidokes Imanuwel.”

Wawun yeg towen ‘Yowbad sod tasesus.’

²⁴Yosep imasis ikous, ikit, ikanow aygan Yowbad nataḡayob, ivays son nakwaw.

²⁵Ta-imasis son; tanāban ises ee... mo ikop natun, taman mo idok natun yagan Yeisuw.

Tassinaps nimeis, silmanin biḡakawns Yeisuw waseg

2 ¹⁻²Tutan inan nikop Yeisuw ven Betelem waseg, wawnuwan ven Yudiy, ven babaw siking Elod. Tassinaps mwasanin siven wanuvid mo imeis Yelusalem, ilansa, “Yakamiy min-Yudiy miking kweivaw, avanuy mikopweyas? Peinan nakakin anwutun kweivaw neipel, mwana nakam kid bakakulul wamatan.”

³King Elod iligen mamagin, ivag aspwayat siney min-Yelusalem.

⁴Mapun ilivan vāgan meivek tasiyas tanuwgwes lun, sisiyas takatimlakeins kaleiwag, katuyouns bimeis.

Imeis mo ikatugan, ilana, “Kelis avanuy mikopweyas?”

⁵Ilansa, “WaBetelem, wawnuwan ven Yudiy; peinan palopit teitan nilel Yowbad anilivan mamagina:

⁶‘ḡakoum ven Betelem wawnuwan ven Yudiy, bo kumug.

Nag kukuyeim Yud guyawaw watiblous, nag.

Peinan takaleiwag bikamat ven Betelem waseg;

mtowen mo bikaleiwag gungamag Yisleil wasigeis.
Palopit towen anilivan mamagin.”

⁷Wankuyeim Elod mo idawes bimeis tassinaps, tasiyas mwana nimeis; siney tasiyas illivans, ikatugan, ilana, “Wutun towen nukukines, avei-yam waseg neipel?”

⁸Ilivans ikous, mo ikayabes bineis Betelem, ilana, “Gwad towen kuneves beibwein; kukin bukubanes, kuyums kumeis, kudibakeigs; yey mo ban akulul wamatan.”

⁹Iliganes aygan King towen, mo inounas ineis. Wutun towen, kweiboug nikines wanuvid, bo imgwayes in, iton wakunuwatan apwaw nabunatum nimsikey-yay.

¹⁰Ikines wutun towen, mo imwasaws avakaein.

¹¹E, isiws bunatum wanuwan, ikines apwaw son inan Meliy, ikululs wamatan, iyakawns waseg. Ikous, mo ikaliyowes siwliyoug isiwyoubus apwaw towen, isekes goul, o pilankisens simasim seikwan, o mul silmanin won takanig biptumis. Imulouls mawan ikous.

¹²Wankuyeim asmikon waseg Yowbad mo ikatimlakes awoum beiyum binekes Elod, mapuna iyums inoyes kadetan ked, ineis wasiven.

Isawls ineis Yidipt

¹³Wankuyeim Yowbad natakayob teitan mo inek Yosep, Yosep anmikon waseg, ilana, “Kutamanaw, kutokes gwad son inan, kusawls kuneis Yidipt, kusesus ee... tutan balivan mo kuyums. Peinan Elod binineiv gwad towen, biban kid bikatimet.”

¹⁴Yosep ikanow aygan, itamanaw boug waseg, itokes gwad son inan, ineis Yidipt.

¹⁵⁻¹⁸Elod gog bikayyamat tasiyas tassinaps, ikayyamata ee... nag; nanon ilana, “O bo ikatidavigs.” Kapasal nuwan, ikayabes nagamag, beiweiy kid apwaw tasiyas tawaw Betelem o walasin ven wasigeis, ilana, “Tasiyas asibweilim katanok o akweiy kuwaweiysa beikous.” Peinan nikatugwan tassinaps wasigeis avei-tut nikop gwad towen.

Idok kid Yeisuw bikatimet, tage Yowbad anilivan kweiboug napalopit Yelemay nilivnek mamagina:

“Ven Lem waseg mo biliganes valam avakaein.

Lakel o vinay-nen Yisleil bivalams nitsiyas pines.

Ta-mawan bivkakes beitout ninous, peinan nitsiyas bo imtakous.” Yelemay anilivan kweiboug, bo ikamat tut towen waseg. E, Yosep siney angamag Yidipt waseg isesus ee... ikanig Elod. Peinan kweiboug napalopit nilivnek mamagina:

“Natug waYidipt mo adouw im.”

¹⁹⁻²⁰E, Elod ikanig, Yowbad natakayob mo inek Yosep, anmikon waseg, igaw nises Yidipt, ilana, “Kutamanaw, kutokes gwad son inan, kuneis

Yisleil; peinan towen sivinan beiweiy gwad bo ikanig. Kameiliw bo ikous.”

²¹Mtopen Yosep itamanaw, itokes gwad son inan ineis Yisleil. ²²⁻²³Iligen Elod ikanig, o Elod natun Alkelaw, taman nakaleiwag bo ikow, ikaleiwag ven Yudiy waseg. Yosep anpwayat beiyum ven towen waseg, kweitan sinap ikakin anmikon waseg, mo inoyes kidenen Galiliy, ineis ven Nasalet, isiwas. Mapuna ikamat palopit anilivan mamagina:

“Bidokes towen gum-Nasalet.”

Yon tabibaptaysein gamags inageiguy towen

(*Mak 1:1-8; Luk 3:1-9, 15-17; Yon 1:19-28*)

3 ¹⁻²Igaw nisesus Nasalet mo Yon isilamaw nageiguy ven Yudiy wanawoud, mtopen tabibaptaysein gamags, ilana, “Bikanavin ninoumiy, sinap kalbaleb kulavewas, peinan Yowbad kakita bisilamaw nakaleiwag.”

³Palopit towen Isaya kweiboug nilivnek Yon nawotet, ilana,

“Aygan bivakaein wanawoud, bilivan,

‘Kukidumwālus daGuyaws inaked; kuvages beibwein.’ ”

⁴Mtopen Yon anakweim wunuwunun kamel, anawat kaleivin kamel, kan gog kulipaw son kitoul.

⁵⁻⁶Mo inounas inekes Yon, min-Yelusalem sisiyas Yudiy gimgilis, sisiyas wunsiyas ven wadadan lay yagan Yoldan, ikamats asisinap kalbaleb, Yon mo ibaptayses tasiyas lay Yoldan waseg.

⁷⁻¹⁰Ikin tasiyas Palisiy sisiyas tasiyas Sadusiy imimeis vāgan bibaptayses, mo ikanes, ilana, “Mwatet yakamiy, adok teitan tan niguyeimiy mapuna kuwenes Yowbad, amipwayat igaw mo bikatimop amisinap kalbaleb. Adok nag kupiyaves amisinap kalbaleb. Kwatimlakeigs miwotet bwein vāgan bakin amisinap kweivaw nukukwawes, bwanabwein. Awoum kuninuways, kulansa, ‘Yakamey bwein, peinan Ebelam delen yakamey.’ Nag gog, Yowbad kadilok dakul tasiyas bivag mo bimlavags Ebelam delen. Ebelem delen mamagina kay. Tut kadilakus mo beiteiy kay kasiyas. Kukin amata kay nag beivag anagin mo beiteiy, bilev bein wākov.”

¹¹⁻¹²Yon mo ilivan, ilana, “Yey, bo nabaptayseimiy yevagam waseg, peinan bo kulavewas amisinap kalbaleb. Igaw teitan beim, tatawtoun; yey nag kadilok bakew inasandol, peinan guyaw avakaein. Mtopen beim mo bibaptayseimiy Kululuwan Bwanabwein waseg, mamagina kov. Mamagina nakaytuk wanaman biwaway anawit, vāgan bikow anagin bwanabwein binow waseigous, simwan gog bisen bigigob kov tuta babaw.”

Ibaptays Yeisuw

(Mak 1:9-11; Luk 3:21-22)

¹³Wankuyeim Yeisuw mo ilisow Galiliy in Yoldan, inek Yon, vagan kid bibaptays.

¹⁴Yon idok kid bisilbwed, ilana, “Kadilok kubaptayseig yey, awoum yey babaptayseim yak.”

¹⁵Iw to Yeisuw, ilana, “Bweina kuvag nagein. Kadiloka sinap babaw bwanabwein bitayakous.” Mo itam.

¹⁶Ibaptays Yeisuw ikous, igalag, libalab bo itavis, Yowbad Kululuwan mo ikin, ankakin mawana bwabun italbelub im, iton Yeisuw wakunun.

¹⁷Aygan teitan walbalab mo iligen, ilana, “Towen Natug bwanabwein; singay ibwein nanoug waseg.”

Iyakwen Yeisuw

(Mak 1:12-13; Luk 4:1-13)

4 ¹Yowbad Kululuwan mo itok Yeisuw, inow wanawoud, vagan Seitan biyakwen.

²Ipos sinawavas yam; ta-kweitan kan ikam yam waseg o boug waseg, nag. Ikous, mo ivag anamoun.

³Tayakwanein gamags mo isap, ilana, “Magat yakoum Yowbad Natun yak, amlivan kusek dakul tasiyas mo bmlavag bled bukukwam.”

⁴Yeisuw ikatimop aygan, ilana, “Bukitab waseg livan nises mamagina:

‘Kan makaw nag biyamov gamag; nag. Tage Yowbad anilivan kweitan kweitan mo biyamoves gamags.’ ”

⁵⁻⁶Ikous sinap towen, Seitan mo itok Yeisuw inow Yelusalem waseg, itamnow Yowbad nabunatum wakunuwatan, idibek, ilana, “Magat yakoum Yowbad Natun yak, kwaspepel kun watinow. Nag aveiyag bivag, peinan livan nises Bukitab waseg mamagina:

‘Bo bisek natakayobs siwotet vagan bintakavateims, binupeims yak; mata ge dakul iweiy kakeim.’ ”

⁷Yeisuw idibek, ilana, “Kweitan livan nises mamagina:

‘Awoum kuyakwen muGuyaw Yowbad.’ ”

⁸Sivtounun mo itok Yeisuw, inow koy singay avakaecin, ikatimlek vena babaw ikous, ikin vena babaw bwanabweins.

⁹Yeisuw ikin ikous, Seitan mo idibek ilana, “Kukulul wamatag mo basekeim vena babaw, wunsiyas ven mukwaleiwag yakoum.”

¹⁰Yeisuw mo ikan Seitan, ilana, “Kusineikik. Bukitab waseg kweitan livan nises mamagina:

‘DaGuyaws Yowbad bukukulul wamatan; Towen anmwānet bukutapwālou waseg.’ ”

¹¹Seitan mo ilisow Yeisuw, inoun. Yowbad natakayobs mo imeis, ilabes Yeisuw.

Isilamaw nawotet ven Galiliy waseg

(Mak 1:14-15; Luk 4:14-15)

¹²Wankuyeim kweitan tut gamag mwasanin mo inekes Yeisuw, ilansa, “Bo iyousis Yon inawes wadeil.” Yeisuw iligen mo inoun in Galiliy.

¹³In Nasalet, ilisow, in Kapaneyum mo isin. Ven towen wakawalaw, kweiboug tasiyas Seblon son Naptal siven.

¹⁴⁻¹⁶Palopit kweiboug Isaya nilivnek mamagina:

“Seblon son Naptal siven, palata-dadan Yoldan,
yol niweiw, ven towen Galiliy nimeim;
tasiyas igaw dadub misikes.

Kweiboug dadub, kamnat avakaein mo ikines.

Kweiboug ven kanig-nen misikes, kamnat mo isap wasigeis.”

Kweiboug palopit nilivnek, tut towen bo ikamat.

¹⁷Yeisuw mo isilamaw nageiguy, ilana, “Kulavewas amisinap kalbaleb, peinan Yowbad kakita bisilamaw nakaleiwag.”

Taplapouls asteivas

(Mak 1:16-20; Luk 5:1-11)

¹⁸Ivayal yevagam towen yagan Galiliy, ikin taw teitan son bwadan iplapouls, mtowen Saymon, kweitan yagan Pita, bwadan Andiluw, peinan siwotet poul-wan.

¹⁹Yeisuw idibakes, ilana, “Kukikuns waseg yey, mo basekeimiy kweitan miwot, waseg bukukwanes gamag.”

²⁰Iliganes, ipiyaves wot towen, ikikuns Yeisuw waseg.

²¹⁻²²Inounas, ineis mo ikines tawaw asteiy, Sebidiy nitun, Yemes son bwadan Yon, tasiyas sisiy times wawag iymiyiems siwot. Yeisuw idawes, mo ilisawes wag towen, ilisawes times, mo ikikuns Yeisuw waseg.

Ilabes gamag babaw

(Luk 6:17-19)

²³Itavin ven babaw Galiliy waseg, igeiguy buntuman tapwaloul sinagog wasigeis, livan bwanabwein isekes vagan bikakins Yowbad nakaleiwag; takatouns ivag ibweins; tasiyas abes igeg, ilabes mo ibweins.

²⁴Tasiyas min-Siliy mo iliganes butun Yeisuw, imeyes takatouns, askatoun kweitan kweitan, ivag mo ibweins, tasiyas igidaged wous, tasiyas bwagaw neiweisy, takabalamats, taydagwegs, ivag mo ibweins asibabaw.

²⁵Gamag babaw mo ikikuns waseg, tasiyas min-Galiliy, min-Dikapolis, min-Yelusalem, min-Yudiy, sisiyas tasiyas palata-dadan Yoldan, ikikuns waseg Yeisuw.

Yeisuw igeiguy wəkoy

5 ¹⁻²Yeisuw ikin gamag singay babaw, ikatulag, in wəkoy, isin, inavamul inekes, mo isilamaw nageiguy, ikatimlakes mamagina:

Tasiyas tamumwasaws

(Luk 6:20-23)

³“Yakamiy waninoumiy kulansa, ‘Nag aveiyag bwanabwein nises wakululuwem,’ bweina kumwasaws, peinan bukusiws Yowbad wanakaleiwag.

⁴“Kumwasaws yakamiy tavvalams, Yowbad bilabeimiy mo beitout ninoumiy.

⁵“Kumwasaws yakamiy tammanums, igaw Yowbad mo bisekeimiy youda babaw.

⁶“Kumwasaws yakamiy magat biseiw nuwamiy sinap didumwal silmanin, igaw mo bivakaein wasigeis yakamiy.

⁷“Kumwasaws yakamiy bukusiwyoubus tasiyas abes igeg, Yowbad mo bisiwyoubumiy yakamiy.

⁸“Kumwasaws yakamiy tatoukums, igaw mo bukukines Yowbad.

⁹“Kumwasaws yakamiy bukulabes gamag vagan biyakousis sikameiliw sisiyas, igaw Yowbad bilivan, ‘Nitug yakamiy.’

¹⁰“Kumwasaws yakamiy, kukin gamag bikamliweimiy peinan amisinap didumwal, bukusiws Yowbad nakaleiwag wanuwan yakamiy.

¹¹⁻¹²“Kumwasaws magat gamag bitawyageimiy, bikamliweimiy, o peinan gungamag yakamiy, siyaweid avakaein bivtokeimiy livan; bweina kumwasaws avakaein, maysamiy bwanabwein igaw mo bukulivatus walbalab. Mawan magin gamag nikamliwes tasiyas palopits kweiboug. Yakamiy bo mawan bikamliweimiy.

Livānen sol yayan o livānen kamnat

(Mak 9:50; Luk 14:34-35)

¹³“Yakamiy mamagina sol silmanin ven babaw sabal-nen yakamiy. Kukin sol sabal-nen bigeg, ta-mawan bitavkek bisabal vayuwein. Peinan bo igeg, misinaka bitalev bein watoulan, gamag mo bivvanis.

¹⁴“Yakamiy vena babaw sikamnat yakamiy. Magat wunovek ven bibunis koy wakunuwatan, makava kimnayawl ven townen. Mawan magin gamag babaw bikines mikamnat yakamiy.

¹⁵“Lamp nigidaged, awoum takow loutan takatugibliken kunuwatan tage tasen wateibol mo bimteil bunatum, nakamnat kadilok bunatum.

¹⁶“Mawan magin yakamiy kummiteilis gamag babaw vagan bikines miwotet bwanabwein, mo biyakawanes Tamads nises wanakaew.

Kaleiwag livānen

17“Awoum kudokeigs yey nam tagulekwein Moses nakaleiwag o tasiyas palopit sikaleiwag, awoum. Yey nam vāgan bakatimweis sikaleiwag, bivakaein.

18“Mounid adibakeimiy, nag kweitan sikaleiwag beikous tut townen waseg. Tut townen ven watinow son libalab nisesus. Māwan magin tasiyas Moses siney palopits sikaleiwag bisesus ee... igaw mo bikamat anagin.

19“Kavel yak bukulivan, ‘Kaleiwag townen kakit, bweina tanumlaves talavewas,’ yak singay bukubus Yowbad nakaleiwag waseg. Tage bukwanow kaleiwag tasiyas, bukwatimlakes gamag, igaw mo bukumwen Yowbad nakaleiwag waseg.

20“Taninuways tasiyas takatimlakeins kaleiwag sisiyas tasiyas Palisiy, gamag babaw idokes asisinap bwein. Tage yakamiy amisinap bwanabwein bivakaein; waseg kwalsawes tasiyas. Kukin gog nag, tamāwan bukusiws Yowbad wanakaleiwag.

Kameiliw livānen

21“Kukwakins tammwayas sikaleiwag kweiboug mamagina:

‘Awoum kuweiy gamag.

Kukin bukkwatimet gamag, takalleiwags mo biyateleims yak.’

22 Tage yey gunakaleiwag mamagina:

‘Kukin yak bukkwamliw soum, takalleiwags mo biyateleims yak.

Kukin bukuyeg soum, tasiyas takaleiwag kawka^vaveks wasigeis mo biyateleims yak.

Kukin go bukuyeg avakaein, adok Yowbad bilaveim bukun wadiginasim, kov bigabum yak.’

23-24“Kukin aveiyag bukukow vāgan bukulun Yowbad waseg mo kunuw kavel nanon igeg waseg yak, bweina kusem mulun abeilun wadadan, kunoun, kun, kulun gamag townen waseg; beikous, mo kuyum kum, kulun Yowbad waseg.

25“Kukin kavel soum biyateleim, kadiloka wāked kulun amiteiy; kukin gog nag, adok soum townen bitokeim takaleiwag to gabman waseg, gabman mo bidibek plisman, bitokeim binaweim wādeil.

26“Mounid adibakeimiy, bukusesus wādeil ee... bukupayin soum beikous, mo bispuyeim bukun wamnat. Kukin gog nag, bukusesun-wan wādeil.

Livānen kaninavay mav

27“Kukwakins tammwayas sikaleiwag mamagina:

‘Awoum kwanavay mav.’

28 Tage yey gunakaleiwag mamagina:

‘Kavel yak bukumet vin, wananoum kid bo kukwanavay soum manawen vin. Amsinap towen igeg.’

²⁹“Kukin gog matam wamkwatay bikaleiwag mo bukukwalouw, kadiloka kugut kulev bein tanaban. Bweina kuyamkwen matam palatanok; mata ge tamkwalan mo son woum bigob wadiginasim.

³⁰“Kukin mukwatay bikaleiwag vagan bukukwalouw, kuboub, kulev bein tanaban. Bweina palatanok namam; mata ge bukuyamkwen woum sona tamkwalan wadiginasim.

Livānen peiyaw vinay

(Matiw 19:9; Mak 10:11-12; Luk 16:18)

³¹“Kukwakins kaleiwag kweitan mamagina:

‘Kukin kal yak bukupiyev mukwav, kusek inalet mo kwayeb binoun.’

³²Tage yey gunakaleiwag mamagina:

‘Kukin kal yak, nag bukutanid, tage bukupiyev mukwav, mo kuvages tasiyas bikaninavays mav son namwan teivaw.’

Livānen tabudabod

³³“Kukwakins tammwayas kweitan sikaleiwag kweiboug mamagina:

‘Awoum kutabudabod mav. Bukutabudabod, bweina kuvag māwan, daGuyaws silmanin.’

³⁴⁻³⁶Tage yey gunakaleiwag mamagina:

‘Awoum kutatabdabod, misinaka amlivan moundid kusek.

Awoum kutabudabod libalab waseg, peinan Yowbad aban.

Awoum kutabudabod ven watinow waseg, peinan Yowbad nakabvawot kaken.

Awoum kutabudabod Yelusalem waseg, peinan daGuyaws inaven.

Awoum kutabudabod kunum waseg, peinan ta-māwan bukuvkek bipwapwakaw o bigunugoun walitanok kunum, nag.’

³⁷Kukin bukutam, misinaka kulivan, kulana, ‘E!'; o kukin bukupiyev misinaka kulivan, kulana, ‘Nag.’ Peinan tabudabod babaw meinoy neim Seitan waseg.

Awoum kwatimapus sinap kalbaleb

(Luk 6:29-30)

³⁸“Kukwakins tammwayas sikaleiwag mamagina:

‘Soum matan nukuweiy inalug matam yak beiweiy.

Soum kudun nukwatimoun, inalug kudum bikatimoun.’

³⁹⁻⁴¹Tage yey gunakaleiwag mamagina:

‘Awoum kwatimop soum peinan ansinap kalbaleb.

Kukin binep silapam wamkwatay, bweina kutouvin binep paliyuwein silapam.

Kukin soum biyateleim bikow amukweim, bweina kusek-vak musag. Kukin soum bikaleiwag, bilana, “Kwanag kukow katanok veit,” bweina kutam, mo kukow kwayuwein veit.’

⁴²Aveyag soum bilivan, bweina kusek, o kukin soum binitoug, awoum kwayus.

Kusiwyoubus tasiyas astakameiliws yakamiy

(Luk 6:27-28, 32-36)

⁴³“Kukwakins tammwayas sikaleiwag mamagina:

‘Kusiwyoubus taliwom, kwamliwes gog tasiyas nikamliweims yak.’

⁴⁴⁻⁴⁵Tage yey gunakaleiwag mamagina:

‘Kusiwyoubus tasiyas nikamliweimiy; kunitougs Yowbad waseg vagan kid bilabes tasiyas iyageimiy.’

Bo maʍan bukulavags Tamads nitun yakamiy, peinan mtowen wanakaew nilabes takalbalabs sisiyas toubweins, kałas ivag ikal yam katanok katanok wasigeis, o kweis isekes asibabaw-wan.

⁴⁶“Kukin bukuyamanes siwayoub wasigeis tasiyas nisiwyoubumiy, adok nag kweitan lałan bukubanes, kulatanes gog simiyas tasiyas takaweins takis; peinan tasiyas iyamanes siwayoub wasigeis tasiyas nisiwyoubus. Maʍana tasiyas, maʍana yakamiy.

⁴⁷“Kukin misinaka simiyas tawlimiyas bukulouls, amisinap nag bitawtoun, peinan tobwag ven gimgilis asisinap maʍan.

⁴⁸“Kadiloka bukuyakousis sinap bwanabwein, maʍan magin ansinap mtowen Tamads wanakaew.

Muloul wasigeis tasiyas tasimavs

6 ¹“Kukin bukulouls wasigeis tasiyas tasimavs, awoum gamag babaw bikakins, mo bilansa, ‘Singay tasiwayoubs tasiyas’; awoum! Magat amisinap maʍan, ta-kweitan maysamiy bukubanes waseg Tamads, walbalab nises.

²“E, bukulouls wasigeis tasiyas tasimavs, awoum tayikin bwagig bimgwayeimiy, mamagina tayyaweids tasiyas wawtakon ven o buntuman tapwaloul waseg ikaypamwes butus, vagan kid gamag babaw bikavasis. Mounid adibakeimiy tut towen mayses ibanes, tage wanakougwaw bo nag.

³“Kavel yak bukuloul wasigeis tasiyas tasimavs, kadiloka kukwawum mumuloul; awoum teitan gamag bikakin.

⁴“Mamagina kusowm mumuloul, Tamads anmwañet bikin, igaw maysam mo bisekeim.”

Nitoug livanen

(Luk 11:2-4)

⁵Yeisuw ilivan, “Gamag mwasanin bo initougs Yowbad waseg, itamanaws itowas wabunatum yagan sinagog, o itowas wawtakon ven mo initougs;

tayyaweids gog. Peinan sivines gamag babaw bikakins, bo kid bilansa, ‘O singay tantougins Yowbad tasiyas.’ Ivavags mav, gamag tasiyas. Mounid adibakeimiy tut townen mayses ibānes; tage igaw gog wanakougwaw bo nag.

⁶“O yakamiy awoum kuvages māwan. Kal yakamiy binitoug, kadiloka beisiw wanbunatum wanuwan, bikatibog koukwed, anmwānet bikulul wamatan Yowbad, mo binitoug. O Tamads bikin anmwānet ininitoug, igaw maysan mo bisek.

⁷⁻⁸“Kukin bukunitougs, awoum kulivans māwana tamgamegs igaw dadub. Idokes kid bibānes youd babaw, peinan asilivan babaw, aveiyov. Awoum kunitougs māwan. E, bukunitougs Tamads waseg, bo ikakin nanawan aveiyag sivinamiy.

⁹⁻¹³“Kadiloka kunitougs mamagina:

‘Timem walbalab,
Yagam bakagoul,
Mukwaleiwag beim.

Aveiyag aw-nanoum sivanam ven watinow bakavag, māwan ivvages walbalab.

Kaem bukusekem nagein.

Kunumlev makalbaleb māwan kanumlev gamag sikalbaleb wasigeis yakamey.

Awoum bukusenam abiyokon waseg.

Igaw kalbaleb waseg kwatinabwem.’

¹⁴“Bukunumlaves o bukuwidis youd babaw wasigeis gamag tasiyas niyagageimiy, igaw gog Tamads mo biwid amisinap kalbaleb yakamiy.

¹⁵“Tage nag bukunumlaves o bukuwidis asisinap tasiyas niyagageimiy, Tamads gog nag biwid amisinap kalbaleb yakamiy.

Pos livānen

¹⁶“Igaw tutan bukupos, tapwāloul silmānin, awoum bimmayag mitamiy, awoum beivag amisinap māwan tasiyas tayyaweids, ivag mamagina siwsawoul wous, vāgan gamag bikines, bilansa, ‘O singay tapsapos tasiyas.’ Mounid adibakeimiy, tut townen mayses ibānes, tage tut wanakougwaw bo nag.

¹⁷⁻¹⁸“Kal yak bukupos tapwāloul silmānin, kuwid magim, kusinat, kuput; mata geg gamag bikakins, anmwānet Tamads bikakin imupos wanuwam, mtowen maysam mo bisekeim.

Libalab wuliyougwan

(Luk 12:33-34)

¹⁹“Awoum kwatinakus miwliyoug babaw ven watinow waseg. Ven watinow wuliyougwan ipwapoup o man kekel ikamkoums, o gamag mwasanin ikaliyowes bunatum ivveinaws.

20 “Tage libalab wuliyougwan bukwatinakus, nag beipoup, man nag beikoums, ta-kal biven; bwein-wan.

21 “Ampalawen muwliyoug kwatinok, mo biseiw nuwam ven towen.

Woun kamnat-nen

(Luk 11:34-36)

22 “Woun kamnat-nen matad. Kukin matam inakaleiwag bwein, woum mo bikamnat.

23 “Tage kukin matam inakaleiwag kalbaleb, woum bo bidadub. O peinan mukwamnat bo idadub, woum singaya dadub.

Takaleiwag katanok

(Luk 16:13)

24 “Ta-mawan gamag anmwānet bikanow ages natuwāveks asteiy; adok bikamliw natovek teitan, tayuwein gog bisiwyoub; adok bikanaway aygan teitan, tayuwein gog bipiyev. E, ta-mawan gamag bikanow ages takaleiwags asteiy, teitan Yowbad, tayuwein money. Misinaka anmwānet aygan bikanow.

Kubukub nuwn

(Luk 12:22-34)

25 “Mapun adibakeimiy, awoum bikubukub nuwamiy silmanin kaemiy vagan biyamoveimiy, o silmanin amikweim vagan bukusikams. Peinan kan na-ikadilok bigimwel mwamovads, o kweim na-ikadilok bigimwel kaleivids, nag.

26 “Kukines mansiyas man iyoyows wanakaew, ta-isapwes kan, ta-itayoyos, ta-isenas waseigous; nag. Tamads wanakaew ituyay mansiyas man, mounid mo bitutuyeimiy yakamiy.

27-29 “Nag kavel yakoum bukunuway mutawtoun waseg vagan ambweilim bibabaw; nag. Aveiyag wawun kuninuwes amikweim? Kukines lalan moloubaw nitatos, na-iwotets, na-ibalals, nag; tage askakin singaya bwanabwein. Mounid adibakeimiy kay kasiyas lalan ikalisow Solomon antubub.

30 “Kay kasiyas nagein nitatos, nubweig beiyakous, bigob kov. Yowbad kay kasiyas isek astubub, mounid mo bisekeimiy amikweim. Adok nag kunmises bwein vagan Yowbad bimtakavateimiy.

31-32 “Awoum ninoumiy bibabaw; awoum kulansa. ‘Aveiyag bitakams? Aveiyag bitamoums? Aveiyag bitasikams?’ Tasiyas igaw dadub asisinap mawan; yakamiy awoum. Tamads gog wanakaew ikakin sivinamiy youd tasiyas.

33 “Towen nakaleiwag bimug waninoumiy, o ansinap didumwal bimug waninoumiy, igaw aveiyag sivinamiy mo bisekeimiy.

34“Nagein kuninuways aveiyag sivinamiy nagein; nubweig mo kuninuways aveiyag sivinamiy nubweig. Yamtan yam mouvitan kweitan; kwayuwein yam mouvitan kweitan.

Awoum kutawyages simiyas

(Luk 6:37-38, 41-42)

7 1“Awoum kudibek soum, kulana, ‘Yak kalbaleb yak.’ Adok Yowbad mo bidibakeim maʼwan.

2“Mikaleiwag waseg bukwawawages simiyas, Yowbad maʼwan mo bikaliwageimiy yakamiy. Magat mukwaleiwag kalbaleb wasigeis simwey. Yowbad mo bikaleiwag maʼwan waseg yaʼkoum. Kukin gog bwein. Yowbad mo bikaleiwag bwanabwein waseg yaʼkoum.

3-5“Adok kukin soum matan musamusan kakit nises, tage nag kukwakin amweilok avakaein wanuwan matam yak nises.

“Kulivan kid, kudibek soum, kulana. ‘O musamusan wamatam nises, bakablev’; tage amweilok avakaein matam tatoneim wanuwan nises.

“Tayyaweid yak! Kwablev amweilok towen wamatam nises. Ikous, wankuyeim mo bukukinbunik vagan bukwablev musamusan towen, soum wamatan.

6“Awoum Yowbad navavag kuvgen kusekes mansiyas awuk, adok bipiyaves mo bigadeimiy. Awoum veigun kulev bwaloud waseg, mata ge bivvʼanis, bivatunis bikatigayay, bo bigeg.

Nitoug livʼanen

(Luk 11:9-13)

7“Kunitougs, mo bisekeimiy; kunineivs mo bukubʼanes. Kugipits, mo bikaliyow nakoukwed pinamiy yakamiy.

8“Tasiyas gog tannitougs ikokews sivavag; tasiyas taninineivs mo bibʼanes sivavag, o tasiyas taggipits, mo bikaliyow koukwed pines tasiyas.

9“Adok ta-kal yak, kukin natum binitoug kan mo bukusek dakul; adok nag.

10“Adok ta-kal yak, kukin natum binitoug in mo bukusek mwatet; adok nag.

11“Yakamiy takalbalebs yakamiy kukwakins youd bwein bukusekes nitimiyas; singay gog Tamads wanakaew bisekeimiy youd bwanabwein, magat bukunitougs waseg.

12“Aveiyag sivinamiy vagan gamag bivages wasigeis yakamiy, kadiloka kuvages maʼwan wasigeis tasiyas. Moses siney kweiboug palopits sikaleiwag maʼwan.

Koukwed kabkakit

(Luk 13:24)

13-14“Kusiws koukwed kabkakit waseg, peinan diginasim kidenen avakaein, awkwedan babayay, gamag babaw isowsiws, inounas waseg;

tage mwamov kidenen kabkakit, awkwedan kabkakit, gamag na-ibabaws bisousiws makadewen ked.

Amweilok anagin

(Luk 6:43-44)

15-16 “Kuvnəsemiy, awoum kuliganes ages palopit tasiyas tayyaweids, tasiyas igaw bisaps wasigeis yakamiy, askakin məwana sip, tage wanuwes məwana awuk nakananeiy. Igaw bukukines siwotet mo bukukwakins asisinap bwein, o nag, kalbaleb. Peinan gamag məwana kay.

“Adilaboub nag beivag gleip anagin, o ayliluweis nag beivag yaveinun anagin, nag.

17 “Kukin amweilok bwein, mo beivag anagin bwein; kukin gog kalbaleb, mo kalbaleb anagin. Mapun alana, ‘Bukukines siwotet mo bukukwakins asisinap aməwan.’

18 “Ta-məwan kay bwanabwein beivag anagin kalbaleb, nag. Ta-məwan kay kalbaleb beivag anagin bwein, nag.

19 “Kay kasiyas nag beivag angis, bo beiteiys bilaves bein wəkov.

20 “Gamag tasiyas bo məwan, bukukines angis mogo kukwakins asisinap bwein, o nag, kalbaleb.

Tayyaweids

(Luk 13:25-27)

21 “Gamag babaw bidibakeigs, bilansa, ‘MaGuyaw yak,’ tage babaw nag beisiws Yowbad wanakaleiwag, nag. Misinaka tasiyas takaweins aygan Tamag, nises walbəlāb.

22 “Igaw yam townen waseg babaw gamag bidibakeigs, bilansa, ‘Nakageiguy yagam waseg, o nakakawsep bwagaw yagam waseg, o yagam waseg mawotet singay tawtoun.’

23 “Yey mo bakatimop ages, balana, ‘Tobwag gamag yakamiy, kunounas, kuneis, peinan miwotet kalbaleb.’

Bunatum ankawtun

(Luk 6:47-49)

24-25 “Kal yak bukuligen aygag, bukwanow, yakoum mamagina tassinap teitan; townen niwlul nabunatum dakul wakunuwatan. Iwlul ikous, kweis mo ikweis avakaein, yevagam ilətay, yag avakaein itow, tage nag igulek bwan townen, peinan niwlul dakul wakunuwatan.

26-27 “Kal yak bukuligen aygag, bukupiyeve, yakoum mamagina takabaləwein teitan, townen niwlul nabunatum walekel. Iwlul ikous, kweis mo ikweis avakaein, yevagam ilətay, yag avakaein itow, ikalouw bwan townen, singay nuwanaw angwelek.”

28-29 Iyakous Yeisuw anilivan towen, bo isom ninous tababaws tasiyas aniganeg aygan waseg, peinan tawtoun ansinap. Nag maʼwan tasiyas takatimlakeins kaleiwag, nag; tage Yeisuw ansinap sinap tatonen.

Toulepel ivag, mo ibwein
(Mak 1:40-45; Luk 5:12-16)

8 ¹Koy towen waseg, Yeisuw iwloubus, singay babaw gamag ibukunis.

²Toulepel teitan isineikim, ikulul, ilana, “Guntovek yak, magat sivinam, kadilokeim bukuvag kaleivig beibwein.”

³Yeisuw isen naman waʼwon toulepel towen, ilana, “Bo bukubwein,” mo ibwein kaleivin towen.

⁴Yeisuw mo idibek, ilana, “Awoum kwamtel sinap towen. Awoum teitan gamag kudibek. Misinaka kukwamat tanuwagan lun waseg, kumuloul waseg Yowbad, maʼwan Moses nakaleiwag; gamag bikineims, bikakins bo kubwein, mo bilansa, ‘O bo ibwein taw.’”

Takalikay natouwat Yeisuw ivag, mo ibwein
(Luk 7:1-10; Yon 4:43-54)

⁵⁻⁶Yeisuw inoun in Kapaneyum, siyas Lom takanaviys sitakalikay mo inek Yeisuw, initoug waseg, ilana, “Guntovek yak, guntouwat ikatoun avakaen, nimmasis wabunatum, ta-maʼwan bininoun, singaya igidaged won.”

⁷Yeisuw idibek, ilana, “Yey baw, bavag mo beibwein.”

⁸⁻⁹Takalikay towen ikatimop aygan, ilana, “Adok nag. Peinan guyaw yaʼkoum, o yey toul, nag kadilok bukusiw waganbunatum. Misinaka kulivan mo beibwein guntouwat. Yey gunakaleiwag nises wasigeis guntakanaviys, teitan badibek ‘Kunoun’ mo binoun; teitan badibek ‘Kum’ mo beim; guntouwat badibek ‘Kuvag towen’ mo bivag. Kaleiwag akakin; misinaka kulivana beibwein.”

¹⁰⁻¹²Yeisuw iligen, bo isom nanon, itouvin idibakes tasiyas tabkunins, ilana, “Guma-Lom towen singay inamis vagan baleb! Ta-aban gum-Yisleil teitan inasimounid maʼwana taw towen. Mounid adibakeimiy ven babaw gimgilis beisiws Yowbad nakabkaleiwag waseg, peinan gamag tasiyas wanuvid sisiyas tasiyas wayavat bo beisiws bikaypuls Yowbad wanakabkaleiwag waseg, sisiyas tamumwey tasiyas Ebelam, Aysak, Yekob. Tage Ebelam tibun mwasanin Yowbad bilev, bineis watoulan, dadub waseg, bivvalams o bikakikilis kumtus, peinan igeg abes tasiyas.”

¹³Yeisuw mo idibek takalikay towen, ilana, “Bweina kunoun; musimounid waseg bo bivag maʼwana nanoum.” E, tut towen waseg, mo ibwein natouwat.

Takatouns babaw ivag, mo ibweins

(Mak 1:29-34; Luk 4:38-41)

¹⁴⁻¹⁵Yeisuw mo isiw in Pita wanbunatum, ikin yawan ikatoun, itakalon won; ikabkwen naman manawen vin mo iloulun won, itamanaw manawen; ikatineg kan Yeisuw beikam.

¹⁶Kwayav waseg mo imeyes tasiyas bwagaw nibugawus, ilivan mo ikilaves, o asibabaw takatouns tasiyas ivag mo ibweins.

¹⁷Wotet towen kweiboug palopit Isaya ilivnek mamagina:

“Im ikow adkatouns, inow, ilavew tanaban, ivageids gog mo tabweins.”

Gamag mwasinis sivines bikabwakuns Yeisuw waseg

(Luk 9:57-62)

¹⁸Yeisuw ikin gamag singay babaw ikatuyouns nimeis, mapun idibek nagamag, ilana, “Kadiloka tatouws, tadopels, taneis palatan.”

¹⁹Ilivan mo im takatimlakein kaleiwag teitan, ilana, “Tamwey, bo babwakun waseg yakoum ampalawen bukunoy.”

²⁰Iwage Yeisuw, ilana, “Awuk bulawud sikabmasis sam wanuwun leg, o mansiyas man iyoyows sibunatum nises wakamweilok; tage Gimgilitoun yey ta-ivag gunakabmasis.”

²¹Inavamul teitan idibek, ilana, “Yey babkunim, guntovek yak; tage bawtameim wanamug ga bayum ban wagunbunatum, bamtakavet tamag, igaw bikanig mo babkunim yak.”

²²Yeisuw ilana, “Awoum. Tut towen kubwakun waseg yey. Bweina takanigs tatineis bidibwanis.”

Bwaw avakaein, Yeisuw ivag mo iniwal

(Mak 4:35-41; Luk 8:22-25)

²³Yeisuw igitouw in wawag, navamul itouws wankuyeim, mo ikuks.

²⁴Ikuks ee... bwaw avakaein ilivatus, kakita bimukuls; tage Yeisuw bo imasis.

²⁵Navamul aspwayat inekes Yeisuw, iwgunis, ilansa, “Matovek yak, kukit, kwatinabweids, bo bitamukuls.”

²⁶Ilana, “amipwayat? Adok nag kusimounids waseg yey, ne?” Mo ikit, itamanaw, ikan yag son kaysay, mo idabab, iniwal singay avakaein.

²⁷Gamag tasiyas ikines, isom ninous, ilansa, “Taw towen kweitana gamag; yag son kaysay iliganes aygan.”

Takabalawein ven Gadal waseg ivag mo ibwein

(Mak 5:1-20; Luk 8:26-39)

²⁸⁻²⁹Ikuks ee... ilugs palatan, ven Gadal waseg. Gamag alugwes watakunumwan tawaw asteiy nisesus, yeiluw neiweiy, singay kapasal nuwes;

nag kadilok gamag binoyes makadewen ked. Tut townen ilugs tasiyas asteiy ilisawes takunumwan, imekes, iwaks, ilansa, “Awoum aveiyag bukunuwakem yakamey, Yowbad Natun yak. Mata nuwanaw bukuyagagem yakamey.”

³⁰⁻³¹ Ikines kadiveiyov bwaloud babaw ikamkwams awuyow. Yeiluw tasiyas igilagels, initougs Yeisuw waseg, ilansa, “Bweina kwayabem bakan bakasiw mansiyas bwaloud wasigeis, ke?”

³² Ilana, “Kuneis.” Ineis, isiws mansiyas bwaloud wasigeis, ikabalaweins, nuwanaw isisawls, papap waseg ikalkalouws, inineis yevagam townen waseg, iwgweles.

³³ Tasiyas tamtakavateins aleis isawls, ineis waven ikamats sinap townen, peinan yeiluw ilisawes gamag, isiws bwaloud wasigeis, iyagages.

³⁴ Misikena gimgilis asibabaw-wan mo isaps, imekes Yeisuw, initougs waseg, ilansa, “Kadiloka kunoun kulisawem.”

Takatoun teitan ivag, mo ibwein

(Mak 2:1-12; Luk 5:17-26)

9 ¹ Mapuna itouws wawag, ikuks, iyums, ineis Yeisuw wanven.

² Gamag mwasanin mo imeyes taw teitan ankatoun avakaein, immasis wakaban, ta-mawan binoun. Yeisuw ikakina tasiyas inamis vagan bileb, mapuna idibek takatoun townen, ilana, “Kalin nuwag yakoum; amsinap kalbaleb bo awid.”

³ Takatimlakeins kaleiwag mwasanin bo ikatilituegs, sisiyas illivans, ilansa, “Anilivan waseg ikaypom Yowbad ansinap; singay kalbaleb!”

⁴⁻⁵ Tage Yeisuw ikakin ninous, mapuna idibakes, ilana, “Aveiyag wawun ninoumiy kalbaleb? Bweina balivan, balana, ‘Bawid amsinap kalbaleb beikous,’ o bweina balivan-vak balana, ‘Kutamanaw kunoun.’ Wotet akweiy gagab waseg yey.

⁶ “Kadiloka kukwakins Gimgilitoun yey, o gunakaleiwag nises ven watinow vagan bawid gamag asisinap kalbaleb, mapuna badibek taw townen bitamanaw binoun.” Yeisuw idibek, ilana, “Kutamanaw, kukow, abam, kunoun kun wambunatum.”

⁷ Taw townen iligen, itamanaw, inoun in wanbunatum.

⁸ Gamag babaw ikines, igoulus Yeisuw, iyakawns Yowbad waseg, peinan bo isek kaleiwag townen wasigeis gamag.

Yeisuw idouw Mati

(Mak 2:13-17; Luk 5:27-32)

⁹ Yeisuw inoun in, ikin taw teitan yagan Mati, isin wakaban, gamag isitakis ikokew; Yeisuw idibek, ilana, “Kukikun waseg yey.” Mtownen iligen, itamanaw, ibukun Yeisuw.

¹⁰ Wankuyeim ikamkwam wanbunatum, takalbalebs babaw imeis, tasiyas takaweins takis sisiyas takalbalebs mwasanin ikaypuls sisiy Yeisuw siney navamul.

¹¹Tasiyas Palisiy ikines, idibakes navamul, ilansa, “Aveiyag wawun mitovek ikamkwam siney takalbalebs sisiyas tasiyas takaweins takis? Bo igak!”

¹²⁻¹³Yeisuw iligen asilivan, ilana, “Misinaka takatouns sivines doket, toubweins nag. Kadiloka kukwakins silawun Yowbad anilivan mamagina: ‘Sivinag siwayoub; makava lun apiyev.’ Yey nam silmanin takalbalebs, awoum badawes tasiyas toubweins.”

Pos livanen

(Mak 2:18-22; Luk 5:33-39)

¹⁴Yon navamul mo inekes Yeisuw, idibakes, ilansa, “Yakamey kapsapos, tasiyas Palisiy ipsapos; tage mivamul ipiyaves pos. Aveiyag wawun?”

¹⁵Yeisuw ankabebay isekes, ilana, “Kukin kal beivays son nakwav, o taliven bineis bivages kan silmanin inakamkwam; bimwasaws-wan; ta-mawan bivāams, nag. Tage tutan anadouw waseg, taw towen binoun, mo bivāams taliven, beipos.”

¹⁶Ankabebay kweitan isen mamagina, “Kweim sigsagob ta-mawan bitabweil waseg kweim kweivaw; bitabweil bo bitadud avakaein.”

¹⁷Kwayuwein ankabebay mamagina. “Awoum bitavgog kunasoup kweiboug, waseg wayn kweivaw; igaw beilol, bitavis kunasoup, biyamkwen wayn; tage kunasoup kweivaw bwein, bitavgog wayn kweivaw waseg, bo bisesun bwein, peinan tawtoun.”

Vinay asteiy Yeisuw ivag, mo ibweins

(Mak 5:21-43; Luk 8:40-56)

¹⁸Igawa igeiguy wasigeis, takaleiwag teitan im, ikulul wamatan, ilana, “Natug kudavin mwana ikanig, kum kusen namam wawon, vagan bukuyamov.”

¹⁹Yeisuw itamanaw ibukunis taw towen sen navamul.

²⁰⁻²¹Igaw inounas, vin natan isap watibwelon, buyavin iwtawout yam babaw, bweilim sinawatan akweiy nag beibwein. Nanon ilana, “Bo bakabkwen Yeisuw anakweim, mo babwein;” mapuna watibwelon Yeisuw ikabikon anakweim matan.

²²Yeisuw itouvin, ikin, ilana, “Kalin nuwag yakoum. Nukusimounid waseg yey mapuna bo kubwein.” Mo ibwein tut towen waseg.

²³Yeisuw inoun in takaleiwag towen wanbunatum, ikin taykiyiks pikolel iykiyiks, tavvalam ivvalams, butus gamag singay avakaein.

²⁴Yeisuw ikin, ilana, “Kunounas. Nag imat gwad towen, immasis-wan.” Tasiyas gog isibawes, idokes kid Yeisuw takabalawein. ²⁵Tage Yeisuw ikayabes, ineis watoulan, mo isiw wabunatum, iyous gwad towen naman, mo itamanaw.

²⁶Butun inawotet towen inganegs ven towen avakaein waseg.

Tawaw ikaw mites, ivag, mo ibweins

²⁷Yeisuw inoun in, tawaw asteiy ibukunis, ikaw mites, iwkuwaks ilansa, “Yakoum Debid tabun yakoum, kusiwyoubum.”

²⁸Isiw wabunatum, tasiyas inekes. Yeisuw ikatiganes, ilana, “Tab kusimounids guntawtoun silmanin wotet towen?” Ilansa, “E, mawan, peinan guyaw yak.”

²⁹Yeisuw mo ikabkwen mites, ilana, “Peinan nukusimounids waseg yey, mapuna bo bukubweins.”

³⁰Mo ilal mites. Anilivan tawtoun isekes, ilana, “Awoum kwamteles sinap towen.”

³¹Tasiyas gog, mo inounas ikamats, vena babaw wasigeis.

Taw teitan anilivan wadadan-wan ivag, mo ibwein

³²⁻³³Yeisuw siney navamul inounas ineis, gamag mwasanin mo imeyes taw teitan takakon, bwagaw neiweiy anilivan wadadan. Bwagaw towen Yeisuw ikayeb mo ikilev, gamag towen mo ilivan bwein. Gamag babaw ikines, bo isom ninous, ilansa, “Sinap kweitan-wan. Kweiboug nag takines wadavanuys, min-Yisleil yakids, peinan kweivaw sinap towen, tawtoun.”

³⁴Tasiyas gog Palisiy, ilansa, “Natawtoun, peinan Seitan ileb, Seitan siyas bwagaw sitovek. Seitan ileb mo ikayabes bwagaw.”

Yeisuw inok nuwan

³⁵Yeisuw itavin ven katanok katanok wasigeis, sisinagog wasigeis ikatimlakes gamag, Yowbad nakaleiwag bwanabwein livanen isekes tasiyas, o takatouns katanok katanok ivages mo ibweins.

³⁶⁻³⁸Ikin gamag singay babaw mo inok nuwan, peinan kululuwes isiwsawoul, peinan bo ilassulis ked, mawana sip; o ta-kal bimgwayes. Mapuna idibakes navamul, ilana, “Kan babaw bo imatuw, asteiyuy bitayoys; kunitougs daGuyaws Yowbad vagan kid bikayabes tawwotets bilabeids kid mo bitatayawes inabag towen.”

Isekis siwotet navamul sinawatan teiy

(Mak 3:13-19; Luk 6:12-16)

10 ¹Yeisuw mo idawes navamul sinawatan teiy, imeis, mo isekes sikaleiwag vagan bwagaw bikayabes, o takatouns bivages beibweins, askatoun kweitan kweitan waseg. ²⁻⁴Tasiyas sinawatan teiy takaweins livanen Yeisuw yiges mamagina:

Saymon, yagan kwayuwein Pita;

Saymon bwadan Andiluw;

Yemes, mtowen Sebediy natun;

Yemes bwadan Yon;
 Pilip son Batolomiw;
 Tomas son Matiw, mtowen takawein takis;
 Yemes, mtowen Alpiyow natun, son Tadiw;
 kweitan gum-Kenan yagan Saymon,
 son Yudas Iskaliyot, mtowen tasikodein Yeisuw.

Yeisuw ikayabes navamul, bineis iwotets
(Mak 6:7-13; Luk 9:1-6)

⁵⁻⁶Tasiyas sinawatan teiy Yeisuw ikayabes silmanin nawotet; iguyes, ilana, “Misinaka kunekes sidayas min-Yisleil, mtasiyas ikankanigs peinan ilassulis ked. Awoun kunekes tobwag ven gimgilis tasiyas ages kweitan; awoum bukuneis ven Samaliy waseg; awoum.

⁷“Igaw bukounounas, kuguyes gamag, kulansa, ‘Yowbad nakaleiwag kakita bisap.’ ⁸Takatouns kuvages beibwein; takanigs kuymoves; tasiyas toulepel kuvages kalivis beibwein, bwagaw kwayabes binounas bineis tanaban. Peinan Yowbad nisiwyoubumiy, bweina kusiwyoubus tasiyas.

⁹“Money awoum kukwawes, goul dakul, o silib dakul, o kopa dakul; awoum. ¹⁰Awoum kunamiy kukwawes waked. Amikweim mwayntanok kusikams; awoum mwaynatan kukwawes; misandol awoum; mikaytuk awoum. Peinan wotet towen bukukwawes, kaeimiy mo bukubanes, maysan wotet.

¹¹“Amata ven waseg bukuneis, kwatugwans gamag wasigeis kavel ansinap bwanabwein, mo kusiwanbanatum, kusesus ee... mo kunounas.

¹²⁻¹³“Aw-bunatum bukusiws waseg, kumulouls wasigeis tasiyas, mo livan siwayoub kusekes. Kukin asininap bwanabwein, mo bimwasaws tasiyas; kukin gog nag, livan towen bwanabwein mo beiyum wasigeis yakamiy. ¹⁴Kukin bipiyaveimiy o bipiyaves amilivan, igaw bukulisawes ven towen kwatsapis kikeimiy musamusan bein ven towen, mo bikakins asininap kalbaleb.

¹⁵“Kweiboug Yowbad iweiyis min-Sodom, min-Gomol peinan asininap kalbaleb; tage wunsiyas ven ipiyaveimiy asininap singay kalbaleb. Igaw tutan Yowbad bikatukin, kalamwey-nen beiweiyis min-Sodom, min-Gomol, tage singaya-wan beiweiyis wunsiyas ven nipiyaveimiy.

Gamag mwasanin igaw mo bikamliwes
(Mak 13:9-13; Luk 21:12-17)

¹⁶“Akayabeimiy silmanin wotet towen. Igaw bukuneis, bukunekes babaw gamag bikamliweimiy. Yakamiy mamagina mansiyas sip tage tasiyas mamagina awuk bulawud biyagageimiy. Kadiloka kuvages amisinap bitawtoun, o kuymans mamagina bwabun yakamiy.

17-18 “Kumtakavateimiy, peinan gamag biyateleimiy yatal avakaein waseg, o sisinagog wasigeis biwaweimiy vatul waseg; biyateleimiy wamtes tasiyas takaleiwags kavkaveks, o king mwasanin wamtes, peinan gungamag yakamiy; mo bukukwamats livaneig. Tasiyas binganegs, sisiyas tobwag ven gimgilis.

19-20 “Igaw biyateleimiy yatal avakaein waseg, awoum ninoumiy bibabaw, awoum kuninuways amawan bukulivans; peinan yatal wanuwan, amilivan tawtoun Yowbad mo bisekeimiy. Nag tatineimiy bukulivans, peinan Tamads Kululuwan bikatipel ansinap, anilivan waseg bukulivans.

21 “Tut towen wanakougwaw, tuwan bisilkod bwadan, vagan takaleiwags bikatimates, o taman bisilkod natun vagan takaleiwags bikatimates; o nitsiyas bipiyaves sikaleiwag timsiyas insiyas, bisilkodes vagan gamag mwasanin bikatimates. 22 O peinan kukwawes yagag yey, gamag babaw mo bikamliweimiy yakamiy. Kukin gog bukusimkines gunawotet waseg, igaw mo bukusesus bwein.

23 “Kukin gamag mwasanin biyageimiy ven kweitan waseg, kusawls, kuneis kweitan ven. Mounid adibakeimiy, igaw vena babaw Yisleil waseg, bukutitavins ee... Gimgilitoun yey mo bayum bam, tage yakamiy igawwan; nag bukuyakousis.

24-25 “Navamul awoum bimgwey natakatimlakay waseg; natouwat awoum bikaleiwag natovek waseg. Tage gunavamul yakamiy mawana mitakatimlakay yey, o guntouwat yakamiy mawan mitovek yey. Bo idokeigs baloum yey, singay bo bitawyageimiy, peinan gungamag yakamiy.

Livānen pwayat

(Luk 12:2-9)

26 “Awoum kuwenes gamag tasiyas. Sinap babaw gamag mwasanin nikawwumes, tage igaw gamag babaw mo bikines kamnat waseg, bikakins.

27 “Sinap bo akatamwālag boug waseg, nukuliganes, vagan bukugeiguys wavtakon ven, wudayam waseg.

28 “Awoum kuwenes tasiyas bikatimates kalivimiy, peinan nag kadilok bikatimates kululuwamiy. Tage kadiloka kuwenes towen biyageg kululuwamiy son kalivimiy wadiginasim, ven to kalbaleb waseg.

29-31 “Adok maysan skwasik mwanay misinak kweinim toya, tage mwanatan beimat Tamads mo bikakin. Kunukun babewein Tamads bo ivin babewein wakunuds; ansinap tawtoun, bo kadiloka bimatavateimiy. Awoum kuwenes gamag tasiyas, peinan Tamads imtakavatemiy; maysamiy singay imug mansiyas skwasik wasigeis.

32 “Kal yak bukwaptel wamtes gamag, bukulana, ‘Yey Yeisuw nagamag yey’, igaw mo bakampel wamatan Tamag wanakaew, balana, ‘Towen

gungamag tonen.’ ³³Kukin gog kavel yak bukwayaneig wantes gamag, yey mo bakayaneim wamatan Tamag wanakaew.

Niwal nag, tage naviy silmanin

(Luk 12:51-53; 14:26-27)

³⁴“Awoum kunuways yey nam ven watinow niwal silmanin; niwal awoum, tage naviy silmanin. ³⁵⁻³⁶Yey nam vagan magaltawaw mwasanin bivatays wasigeis timsiyas, o magalvinay bivatays wasigeis insiyas o wasigeis yiwsiyas, peinan gamag taliven bo bikamliwes.

³⁷“Kal yak kusiwyoubus avakaein tamam son inam, tage yey kusiwyoubug kakit, nag kadilok bukusesuna gungamag yakoum. Kal yak kusiwyoubus avakaein nitum, tage yey kusiwyoubug kakit, nag kadilok bukusesuna gungamag yakoum.

³⁸“Kadilok bukukow amklos, bukwabkunig vagan mo bukukwanig; tage kukin bukupiyev, nag kadilok bukusesuna gungamag yakoum.

³⁹“Kukin bukwayus mwamovam, bo biyamkwaneim; kukin gog biyamkwen mwamovam peinag yey, igaw mo bukubanes.

Maysamiy

(Mak 9:41)

⁴⁰“Kukin kal beitam waseg yak, mamagina bo itam waseg yey; mo itam-vak waseg Yowbad, peinan Yowbad nikayabeig nam.

⁴¹“Kukin kal yak bukwaveiyon waseg palopit teitan, peinan palopit towen, mogo palopit maysan bukukow. Kal yak bukwaveiyon waseg tadidumwal, peinan tadidumwal towen, mogo maysan tadidumwal bukukow.

⁴²“Kal yak bukusiwayoub kakit teitan gwad waseg, peinan gunavamul towen, mamagina kwavtanok anasoup bukusek, moundid adibakeim maysam nag biyamkwen.”

Yon ikayeb navamul inekes Yeisuw

(Luk 7:18-35)

11 ¹Yeisuw anilivan towen, imulis nagamag tasiyas sinawatan teiy. Imulis ikous, inoun in ven babaw, ikatimlakes gamag babaw, igeiguy.

²⁻³Misumkwey towen Yon nises wadeil, mtowen tabibaptaysein gamags, butun Yeisuw inawotet iligen, ikayeb navamul mwasanin inekes Yeisuw, ikatugans, ilansa, “Yowbad bikayeb Mesay beim, mtowen yakoum? o nag? tabta teitan bakakayamat igaw beim wankuyeim?”

⁴⁻⁶Yeisuw ikatimop asilivan, ilana, “Kuneis, kwatimlakes Yon sinap towen nukukines o kuliganes; magina toukwaws mites bo ikiplal, takagayals bo inounas bwein, toulepels bo ibwein kalivis, tasiyas ituy

tiges bo iliganes livan, takanigs bo ikits mwasanin, o tasiyas tasimavs inganegs Yowbad anilivan bwanabwein. Kal yak bukusimounid gunawotet waseg, tage ta-kupiyaveig, igaw mo bukumwasaw.”

⁷Iyums tasiyas, Yeisuw mo ikatiganes gamag babaw peinan Yon, ilana, “Kweiboug kuneis wanawoud, aveiyag silmanin bukukines? Bukukines kay iguwen yag, ne?

⁸“O bukukines gamag teitan anakweim mwaynamnabwein ne? Nag, adok tasiyas nisesus guyawaw wasibunatum.

⁹“Tage, kuneis kukines palopit teitan. Mounid mtowen Yon nimgwayes palopit wasigeis.

¹⁰“Peinan livanen Yon nises, magina Yowbad anilivan nidibek Mesay, palopit mo ilel Bukitab waseg mamagina:

‘Akayeb guntouwat bimgwayeim, bikidumwal maked beibwein.’ ”

¹¹Yeisuw mo ilana, “Mounid adibakeimiy nag kal nikop ven watinow ikalsow mtowen Yon, peinan Yon ikalsawes gamag babaw; tage Yowbad nakaleiwag kweivaw waseg asibabaw ikalsawes Yon.

¹²“Misiyamun Yon inawotet waseg, tasiyas tatawtouns sivines Yowbad nakaleiwag, isilamaws sitawtoun waseg iyyousis ee... nagein bo mawan.

¹³“Tut kweiboug Moses nakaleiwag o tasiyas palopit, Yowbad nakaleiwag isekes gamag wasigeis ee... wankuyeim mo isap Yon.

¹⁴“Kukin sivinamiy bukuliganes agulivan towen mo bukukwakins kavel Yon. Towen Ilaytiy vagan bikidumwal Mesay inaked, mtowen mound Yon.

¹⁵“Yakamiy tigamiy sam bweina kuliganes.”

¹⁶⁻¹⁷Yeisuw mo ilivan, ilana, “Amawan bakabebay mo bukukwakins amisinap? Adok yakamiy mamagina gamagal iwliwals wavtakon ven, idibakes sisiyas, ilansa, ‘Kawayay kup, tage nag kusilasals; ikous mo kalloupid, tage nag kuvāams.’

¹⁸⁻¹⁹“Peinan Yon isap, nag ikamkwam; na-imoum wayn, mo kulansa, ‘Takabalawein towen, peinan baloum iweiy.’ Gimgilitoun yey mo asap, akamkwam, amwamoum, mogo kulansa, ‘Tagovek towen, o tamwamwein wayn towen, ikaveiyons siney takalbalebs o tasiyas takaweins takis.’ Ga bukukines aw-wotet bwein, mo silawun bukukwakins, sinap tonen.”

Yowbad bimop ven mwasanin asisinap kalbaleb

(Luk 10:13-15)

²⁰Ven mwasanin nikines Yeisuw nawotet tawtoun, tage nag ipiyaves asisinap kalbaleb, mapun Yeisuw mo ikanes, ilana:

²¹⁻²²“Kuvāams yakamiy Kolesin o yakamiy Beteseid. Magat kweiboug tasiyas Tayil o tasiyas Sidon bikines mulin naman Yowbad māwana gunawotet nukukines nagein, nuwanaw mo bisimounids, bipiyaves kid asisinap kalbaleb, sona koun sewed bivāams-wan peinan asisinap kalbaleb, mo bipiyaves.

Yakamiy gog nag. Mounid adibakeimiy igaw tutan Yowbad bimop vena babaw asisinap, tasiyas bilivatus sikalbaleb kakit, yakamiy gog avakaein.

²³⁻²⁴“O yakamiy-vak Kapaneyum bukumwens kid wanakaew; nag gog, bukubus watinow, bukuneis wāTum. Magat kweiboug tasiyas Sodom bikines mulin naman Yowbad, māwana gunawotet nukukines, mo bivages asisinap kweitan, Yowbad nag beiweiys tasiyas, bisesus ee... tut towen bisigagas. Mounid adibakeimiy igaw tutan Yowbad bimop vena babaw asisinap, tasiyas Sodom bilivatus sikalbaleb kakit, yakamiy gog avakaein.”

Yeisuw ansinap kweitan

(Luk 10:21-22)

²⁵⁻²⁶Tut gog towen Yeisuw initoug, idibek Taman, ilana, “Tamag yaḡoum, libalab natovek o ven watinow natovek yaḡoum. Kalin nuwag yak peinan nukusowm sinap tatonen. Tasiyas tassinaps nag bikakins, tage kukwatimlakes tasiyas mamagina gamagal; mo ikakins tasiyas. Peinan kaleiwag bwein wananoum.”

²⁷Yeisuw mo ilivan, ilana, “Tamag bo itam youd babaw waseg Natun yey. Tamag anmwānet ikakin Natun yey; o yey agumwānet akakin mtowen Tamag. Igaw, kalisiy beivag sivinag mo bakatimlakes; e, tasiyas mo bikakins Tamag.

²⁸“Yakamiy kunamiy moumouvit o miwotet moumouvit, kumeis waseg yey, mikabiyeiwas silmanin.

²⁹“Kumeis, kulabeigs kwanag waseg, mo bukukwawes agusinap yagan manum; kululuwamiy mo bibanes sikabiyeiwas.

³⁰“Peinan kid kwanag gagab, gunawotet bwein.”

Yeisuw takaleiwag yam tapwāloul waseg

(Mak 2:23-28; Luk 6:1-5)

12 ¹Misumkwey towen Yeisuw siney navamul inoyes kweitan ked wanuwan bag, yam tapwāloul waseg; navamul asimoun, ilapes wit anagin, ikams.

²Tasiyas Palisiy ikines, idibakes Yeisuw, ilansa, “Kukin muvumul, nag igoulus Sabat.”

³⁻⁴Yeisuw ilana, “Adok nag kukwakins livānen Deibid, nises Bukitab wanuwan. Peinan asimoun siney nagamag, isiws Yowbad wanbunatum, ikams bled towen nises Yowbad wamatan. Tanuwgwes lun bo ikatibomes bled towen. Na-ikadilok Deibid beikam; nagamag-vak nag beikams; misinaka tasiyas tanuwgwes lun. Tage tanuwagan lun isek Deibid sen nagamag, mo ikams, peinan singaya asimoun.

⁵“O adok nag kuvinis Moses nakaleiwag, peinan Sabat waseg tasiyas tanuwgwes lun iwotets lun, Yowbad wanbunatum, tage nag ivag asisinap kalbaleb.

- 6 “Gunakaleiwag towen kweivaw imug-wan Yowbad nabunatum waseg.
 7 “Livan nises Bukitab waseg, ‘Makava lun apiyev; sivinag kid siwayoub.’ Magat bukukwakins Yowbad anilivan towen, adok nag bukuygages tasiyas toubweins.
 8 “Peinan Gimgilitoun yey, S̄abat tanuwagan yey.”

S̄abat waseg Yeisuw ileb teitan, naman ipam
(Mak 3:1-6; Luk 6:6-11)

- 9 Yeisuw ilisawes, inoun, isiw sisinagog silmanin tapw̄aloul.
 10 Sinagog wanuwan teitan nises, naman ipam. Tasiyas sivines biyateles Yeisuw, ikatiganes, ilansa, “Tab kadilok bitavag takatouns beibweins, S̄abat waseg?”
 11-12 Iwage Yeisuw ilana, “Adok nag teitan yakamiy alen sip bikalivatow bein w̄aleg S̄abat waseg, bilivan, bilana, ‘Deisa bisiw, peinan S̄abat.’ Adok nag. Adok biyous, bikatinob, ne? E, gamag singay imgwayes wasigeis aleimiyas. Mapun bweina bitaleb sod S̄abat waseg.”
 13 Yeisuw mo idibek taw towen, ilana, “Kusayel namam palawen neipam.” Iyasel mo ibwein, m̄awana paliyuwein.
 14 Siyas Palisiy bo igeg ninous, isaps, illivans sisiyas, sivines kid biyagages mtowen Yeisuw.

Yowbad natouwat

- 15-16 Yeisuw ikakin ninous, inoun in. Gamag babaw ibw̄akuns Yeisuw waseg; takatouns ivag mo ibweins; idibakes, ilana, “Awoum kwamteles youd towen; awoum!”
 17-18 Mo ikamat Yowbad anilivan palopit towen Isaya nilivnek mamagina:
 ‘Kukines guntouwat, bo adouw silmanin gunawotet.
 Singay ikalin nuwag mtowen.
 Basek kululuwag, mo bisek nakaleiwag didumwal, ven babaw wasigeis.
 19 Nag biwkuwak, nag bikamniman, gamag nag biliganes aygan wawtakon ven, nag.
 20 Kaytuk isasal, nag biwut bilev, nag.
 Wodam nakagidaged kalbaleb, nag bisuwmet, nag.
 Igaw nawotet waseg sinap didumwal mo biton.
 21 E, tobwag ven gimgilis binmises v̄agan mtowen bilabes.’

Ivtokes livan Yeisuw
(Mak 3:20-30; Luk 11:14-23; 12:10)

- 22 Wankuyeim itokes teitan gamag, baloum neiweiy, imeyes Yeisuw waseg, ankatoun mamagina ikaw matan, o wadon ikapet; ta-m̄awan

bikapwageg bilivan. Inekes Yeisuw, ivag mo ikilev, bo ibwein gamag towen, ikin, ilivan bwanabwein. ²³Gamag babaw ikines, bo isom ninous, ilansa, “Adok mtowen Deibid tabun, Mesay.”

²⁴Siyas gog Palisiy iliganes, mo ivtokes livan, ilansa, “Siyas baloum sitovek Seitan mtowen ileb Yeisuw, mo ikayabes baloum.”

²⁵Yeisuw ikakin ninous, mapuna idibakes, ilana, “Kukin bod avakaein tawtoun nises; tage bod to gimgilis bikavikuns sisiyas; bilivis, bo beigwey bod towen, beikous. O ven o kum mawan, kukin gamag bilivis bivages bod babaw, bo beigwey ven towen o kum towen.

²⁶“Mapuna kuninuways Seitan inabod, kukin Seitan bilabeig mo bakayeb Seitan natouwat tasiyas baloum, mogo Seitan inabod bilivis, bo beikous nakaleiwag tonen. Tage nag.

²⁷“O kuvtokeigs livan, kulansa, ‘Seitan ileb mo ikayabes baloum,’ o kal ilabes mivamul mo ikayabes baloum? Kuninuways asisinap tasiyas mo bukukwakins bo ibol amilivan.

²⁸“Kukin gog Yowbad Kululuwan bilabeig mo bakayeb baloum, mapuna Yowbad nakaleiwag bo isap wasigeis yakamiy.

²⁹“Kweitan sinap kuninuways: Ta-mawan bitasiw tawtoun gamag wanabunatum mo bitaven navavag. Deisa bitayous taw towen, tayawen naman, kaken, vagan nag binoun, mo bitaven navavag, tayakousis.

³⁰“Kukin kal nag bilabeig gunawotet waseg, gamag towen isilbwed gunawotet. O kalisiy nag bikatikunakus wagueunseigous, tasiyas gog bikatigayes.

³¹“Mapun adibakeimiy, amisinap kalbaleb o amilivan kalbaleb Yowbad biwid babaw beikous; tage kweitan sinap nag. Magat bukuyeg Yowbad Kululuwan, nag biwid sinap towen, nag.

³²“Kukin bukutawyageig Gimgilitoun yey, Yowbad biwid amsinap towen; tage bukutawyeg Yowbad Kululuwan Bwanabwein, Yowbad nag biwid, tut towen nag, o tut wanakougwaw nag.

Kay anagin

(Luk 6:43-45)

³³“Magat kay bwein, anagin bwein. Magat kay kalbaleb, anagin kalbaleb. Takin anagin mo takakin kay amawan, bwein o kalbaleb.

³⁴“Yakamiy takalbalebs magina mwatet yakamiy, ta-mawan bukulivans bwein, peinan ninoumiy kalbaleba singay; mapun amilivan kalbaleb.

³⁵“Tasiyas toubweins asisinap bwein, mapuna siwotet bwein; tage tasiyas takalbalebs asisinap kalbaleb, mapuna siwotet kalbaleb.

³⁶“Kukin bukulivans mav, Yowbad mo biyateleimiy, igaw tutan bikatukin sinap babaw gamag wasigeis.

³⁷“Magat amilivan bwein bo bukounounas bwein, o kukin gog amilivan kalbaleb mo bukulivatus kalbaleb.”

Gamag mwasanin sivines bikines naman mulin

(Mak 8:11-12; Luk 11:29-32)

³⁸Wankuyeim takatimlakeins kaleiwag mwasanin sisiy tasiyas Palisiy mwasanin idibakes Yeisuw, ilansa, “Tamwey, sivinem namam mulin bakakin, mo bakasimounid waseg yak.”

³⁹⁻⁴⁰Yeisuw ikatimop, ilana, “Kalbaleb gamag, tapiyaveins Yowbad yakamiy, sivinamiy bukukwakins namag mulin. Nag kweitan sinap bukukwakins; misinaka sinap townen, peinan palopit townen kweiboug Youna nises uloulas wanuwan, yam kweitoun o boug kweitoun, maᵛan yey Gimgilitoun yey bo basesun pwepway wanuwan, yam kweitoun o boug kweitoun.

⁴¹“Min-Ninavek igaw mo bitamanaws yaᵛal waseg, bilivans vaᵛan bukukwakins amisinap kalbaleb, gudwouvaws yakamiy. Peinan tasiyas iliganes Youna nageiguy mo ilaves asisinap kalbaleb; tage kaleiwag nagein nukuliganes ikalsow Youna nageiguy. Kuliganes; nag gog, nag kulaves amisinap kalbaleb.

⁴²“Igaw tutan Yowbad biyaᵛal wasigeis gamag babaw, mo kwin maᵛawen kweiboug inaven wayals mo bilivan vaᵛan bukukwakins amisinap kalbaleb, gudwouvaws yakamiy. Peinan maᵛawen kwin inoun in singay kadiveiyov vaᵛan biligen Solomon ansinap; tage sinap townen nagein nukuliganes ikalsow Solomon ansinap waseg.

Gamag ibwein mo ilivet kalbaleb singay

(Luk 11:24-26)

⁴³⁻⁴⁵“Magat yeiluw bikilev gamag, mo bitaᵛin ven babaw, binineiv nakabiyeiwas. Binineiv nag, bilivan bilana, ‘Bayum ban wagunbunatum to nalisow.’

“Beiyum biban nabunatum makaw, bo itaneivis, youd babaw bo ilivkases bwein; bikalin nuwan, bein ikin siney teinim teiy asisinap singaya kalbaleb, tasiyas asibabaw mo beisiws wabunatum, bisesus bisigagas. Kweiboug gamag townen nakalbaleb peinan yeiluw neisiw, tage nakabi yokous waseg singaya kalbaleb. Gudwouvaws yakamiy mikalbaleb bukulivatus maᵛan.”

Yeisuw taliven

(Mak 3:31-35; Luk 8:19-21)

⁴⁶Yeisuw igawa ilivan gamag wasigeis, inan budan itamanaws watoulan gamag babaw, sivines binekes, bilivans sisiy Yeisuw.

⁴⁷Teitan ilana, “Inamwa budam nitatos watoulan.”

⁴⁸⁻⁴⁹Yeisuw idibek taw townen, ilana, “Kuninuways kalisiy inag budag,” mo ikatimlek navamul tasiyas nitatos wadadan, ilana, “Mtasiyas-one inag o budag.

⁵⁰“Kal yak bukukow nanon Tamag walbalab, mounid yakoum bwadag o nagut o inag.”

Talavein veitun

(Mak 4:1-9; Luk 8:4-8)

13 ¹Yam towen Yeisuw ilisow nabunatum, iwloubus in wakawalaw, isin.

²Gamag singay babaw inekes, mapuna itouw wawag, isin. Babaw gamag itamanaws itowas wakawalaw. Yeisuw itouvin, ikines gamag babaw, mo ilivan.

³Tage ansinap babaw-wan livan kabebay waseg isekes gamag tasiyas, ilana, “Teitan taw in wabag ilivelov veitun.

⁴“Mwasanin ikalkalouw ininein waked, man imeis ikamkwams veitun towen waked.

⁵⁻⁶“Mwasanin ininein wadikudakul, pwepway nag mananan; nuwanaw isob peinan pwapwayein kakit-wan, tage ivag kalas mo iyag, peinan gidwalin nag beisoul mananan.

⁷“Mwasanin sisiyas awuyow veitun in wapwepway. Awuyow isobs, ivkuvakaen, mapuna kan igwey.

⁸“Mwasanin gog ininein pwepway bwanabwein waseg, isob, ivag anagin bwein, mwasanin lakatutan, mwasanin sinawanim, mwasanin sinawatoun.

⁹“Yakamiy tigamiy sam bweina kuliganes.”

Silawun kabebay

(Mak 4:10-12; Luk 8:9-10)

¹⁰Wankuyeim gog Yeisuw navamul inekes, ilansa, “Aveiyag silawun mukwabebay wasigeis tasiyas?”

¹¹Yeisuw ikatimop ages, ilana, “Yowbad itam, sinapun libalab kaleiwag-nen isekeimiy; tasiyas gog nag.

¹²“Kalisiy yakamiy amisinap nises, igaw amisinap bikatimweis, bivakaen; tasiyas gog nag, bo bikow asisinap tasiyas, makava bisesus.

¹³“Mapuna akabebay wasigeis tasiyas, mo bikines tage nag biwtusis, o bikatiliganes tage nag biliganes bunik vagan bikakins, nag.

¹⁴“Kweiboug palopit Isaya anilivan bo ikons tasiyas; anilivan mawan:
‘Bukuliganes tage nag bukukwakins.

E, bukukines tage nag bukuwtusis.

¹⁵Peinan ninous gamag tasiyas bo imouvit;

bo ituy tiges;

bo ikaw mites;

mata ge mites waseg beikins,

o tiges waseg beinegs,

bikakins, mo bikanavin ninous,
bavages kid beibweins tasiyas. Nag gog.’

16 “Yakamiy bwein, mitamiy ikin, tigamiy ineg.

17 “Mounid adibakeimiy kweiboug palopit babaw sisiyas tasiyas tadidumwals sivines bikines sinap towen nagein nukukines, o biliganes kaleiwag towen nagein nukuliganes; sivines kid, tage nag.

Silawun ankabebay towen talavein veitun

(Mak 4:13-20; Luk 8:11-15)

18 “Kadiloka kuliganes silawun kabebay towen talavein veitun.

19 “Veitun tasiyas ineinein waked mamagina gamag tasiyas iliganes Yowbad nakaleiwag, tage nag bikakins, towen takalbaleb mo bisap, bikow livan towen nises waninous, binow.

20-21 “Veitun wadikudakul mamagina gamag tasiyas iliganes livan towen, isimounids, imwasaws waseg, ee... bimwemway nen, gidiwlis nag beisoul mananan, gamag mwasanin biyages livanen Yowbad, biyagages tasiyas takaweins Yowbad anilivan, mo bikalkalouws gamag tasiyas.

22 “Veitun tasiyas sisiyas awuyow, mamagina gamag tasiyas iliganes livanen Yowbad, mo inuwes youd babaw ven watinow, sivines kid biguyaws, mo ilisawes ked bwanabwein, mapuna Yowbad nakaleiwag igwey wasigeis tasiyas, nag ivag angis.

23 “Tage veitun tasiyas pwepway bwanabwein waseg, mamagina gamag tasiyas iliganes livan, ikakins mo ivag angis, teitan lakatutan, teitan sinawanim, teitan sinawatoun.”

Kabebay wit son awuyow

24 Vayuwein Yeisuw ikabebay, idibakes, ilana, “Bakabebay mo bukukwakins Yowbad nakaleiwag; peinan mawana gamag isop veitun bwanabwein wanabag.

25 “Wankuyeim boug waseg, gamag babaw bo immasis, teitan nikamliw tagnibag im wanabag isop awuyow magin mawana kan, tobwag gog. Mo iyum in.

26 “Igaw tut wankuyeim iwuw anagin mo ibanes awuyow tobwag waseg.

27 “Nagamag inekes tagnibag, ilansa, ‘Tamwey, adok muveitun bwein nitasapwes, avanuy meinoy neim awuyow towen kalbaleb?’

28 “Tamwey ilana, ‘Adok towen nikamliweids!’ Nagamag ilansa, ‘Tabta bakan kagut awuyow siyas?’

29-30 “Ilana, ‘Nag. Adok bukugutes mwasanin kan sona bukugutes sisiyas awuyow. Babaw bisesus, bimatuw kan, mo badibek tasiyas tatayaweins kan, balana: Wanmugwana awuyow kugutes kwatikunakus, kusinaves, kukwawes, kunawes, kugabus; ikous; mo kan kutayoyos, kwatikunakus kunawes wgunseigous.’ ”

Kabebay akweiy, tipol, yist
(*Mak 4:30-32; Luk 13:18-21*)

³¹⁻³² Kwatounun kabebay isekes, ilana, “Bakabebay mo bukukwakins Yowbad nakaleiwag; peinan mawana veitun kay yagan tipol, gamag isop wanabag, veitun gog singay kekel, tage isob kay kaywen, mo ivakaein, man iyoyows imeis iwlules sibunatum wayayagein, kay-nen avakaein.”

³³ Kwavasin kabebay isekes, ilana, “Bakabebay mo bukukwakins Yowbad nakaleiwag; peinan mawana yist, natan vin ikow yist kakit, isen wanuwan pwalaw kwavitoun, tamkwalan mo ilol.”

Tut babaw Yeisuw ikabebay
(*Mak 4:33-34*)

³⁴⁻³⁵ Sinap tasiyas babaw Yeisuw isekes nakabebay waseg; nag kweitan livan kamnat isekes gamag babaw, nag. Tut towen waseg bo ikamat palopit anilivan towen nilivnek mamagina:

‘Gunakabebay balivan;
magina bakamat sinap misikena kweiboug nikawum.’

Silawun kabebay wit son awuyow

³⁶ Anilivan ikous, ilisawes gamag babaw, inoun in wabunatum. Navamul mo inekes Yeisuw, ilansa, “Kwamtilakem silawun kabebay awuyow wabag.”

³⁷ Yeisuw mo ilik, ilana, “Talavein veitun bwanabwein yey, Gimgilitoun yey.

³⁸ “Abeibag ven towen watinow; veitun bwanabwein, tasiyas itams Yowbad nakaleiwag waseg; awuyow veitun towen takalbaleb inagamag.

³⁹ “Mtowen takammeiliw nisop awuyow, mtowen Seitan; tutan tayoy, nakabiyokous tut; tatayaweins kan tasiyas Yowbad natakayob.

⁴⁰⁻⁴² “Nakabiyokous tut mamagina bikatikunakus awuyow bigabus, peinan Gimgilitoun yey bakayeb min-libalab, gunakabkaleiwag waseg bikatikunakus tasiyas takalbalebs sisiyas tapiyaveins sinap bwein, bilaves bineis kov avakaein waseg, mapuna tasiyas bivvalams-wan, peinan abes singay kalbaleb.

⁴³ “Tut towen wanakougwaw tasiyas tadidumwals bikamnats mawana kalas, wanuwan Tamads nakabkaleiwag. Yakamiy tigamiy sam bweina kuliganes.”

Kabebay kweitoun

⁴⁴ Yeisuw mo ilana, “Bakabebay mo bukukwakins Yowbad nakaleiwag; peinan mawana money singay babaw teitan gog gamag bisown wanabag, bises ee... mo bikanig. Igaw gog kweitan gamag mo biban money towen,

bisowm vayuwein, biyamiyis navavag babaw, maysan bikow, bigimwel pwepway townen, singay bikalin nuwan peinan namoney singay babaw pwepway townen waseg.

45-46 “Vayuwein bakabebay mo bukukwakins Yowbad nakaleiwag; peinan māwana takunakun teitan inineiv kun bwanabwein, iban kun kuvakaein imgwayes kuna babaw; inakun babaw mo ilev silmanin kun to kweivaw, peinan singay bwanabwein.

47-48 “Sivtounun bakabebay mo bukukwakins Yowbad nakaleiwag; peinan māwana wot ilaves wayol, ikwanes in kweitan magin kweitan magin. Bo ikalawt wot; ibiteilis, in wanakaew, mo bikatukins, in bwanabweins bidagis bein wanuwan abmavin, siyas gog kalbalebs, yegay, ikawes, ilaves.

49-50 “Tut nakabiyokous waseg bo māwan, bakayeb min-libalab bikawes takalalebs bilaves bineis kov avakaein waseg, toubweins gog bisesus. Tasiyas takalalebs mo bivalams avakaein, peinan singaya abes bigeg.”

Yowbad nakaleiwag sinapun

51 Yeisuw mo ikatiganes, ilana, “Tab kukwakins sinap siyas babaw?” Itams, ilansa, “Oo!”

52 Ilana, “Tasiyas gog takatimlakeins kaleiwag mwana nikakins Yowbad nakaleiwag sinapun, tasiyas gog asisinap kweivaw bwanabwein, kweiboug bwanabwein; māwana tanuwagan bunatum nawliyoug babaw bwanabwein, kweiboug o kweivaw.”

Min-Nasalet ipiyaves Yeisuw

(Mak 6:1-6; Luk 4:16-30)

53-54 Yeisuw nakabebay iyakous, inoun in wanven, isiw wanuwan sinagog silmanin tapwaloul, ikatimlakay. Isimasom ninous tasiyas, ilansa, “Ampalawen meinoy neim ansinap singay avakaein o nawotet singay tawtoun?”

55-56 “Adok tawtelein amweilok natun townen; inan Meliy nises; budan nisesus, tasiyas Yemes, Yosep, Saymon, Yudas; o nunet asibabaw nisesus. Ansinap avanuy meinoy neim?”

57 Bo igeg ninous, magina ipiyaves kid Yeisuw. Yeisuw gog mo ikatimop asilivan, ilana, “Vena babaw ivnases palopits, tage wasiven tatineis bo nag; wasibunatum tatineis bo nag.”

58 Yeisuw nawotet tawtoun na-ibabaw wanven tatonen, peinan taginvens nag isimounids waseg.

Kweiboug Elod nibob kayob Yon

(Mak 6:14-29; Luk 9:7-9)

14 1-2 Misiyamun townen gabman yagan Elod iligen butun Yeisuw, mapuna idibakes natouwats, ilana, “Mtowen tabibaptaysein

gamags yagan Yon, kweiboug abob kayon, imat, adok bo ikit vayuwein, mapun nawotet tut towen singay tawtoun.”

³⁻⁵E, kweiboug Elod niyous Yon, iyawen naman, isen wadeil, peinan Elod nikwey bwadan Pilip nakwav Elodiyas, Yon nilivan, “Awoum kukwey bwadam nakwav.” Elod sivinan beiweiy mtowen Yon, mapuna iyous, isen wadeil, anpwayat gog beiweiy Yon, peinan gamag babaw sivines Yon, idokes palopit teitan.

⁶⁻⁷Wankuyeim isagal, peinan tutan inan nikop-yay, mtowen Elod ikamkwams siney nagamags. Elodiyas natun kudavin isal wamtes tawaw tasiyas, Elod ikalin nuwan, idibek, ilana, “Aveiyag sivinam bo basekeim, tabudabod tamag.”

⁸Nawen in ikatugwan inan waseg, ilana, “Inag, aveiyag banitoug?” Inan ilana, “Kunitoug busbwesan Yon bisekeim.” Inek Elod, ilana, “Kusekeig busbwesan tabibaptaysein gamags, towen Yon. Bibwabwes kayon, busbwesan bisenas wanuwan abmavin, mo kusekeig.”

⁹King towen mo igeg nanon, tage peinan gamag babaw niliganes nitabudabod anilivan, mo itam.

¹⁰⁻¹¹Itam, ikayeb teitan in wadeil, ibob kayon Yon, busbwesan isen wakabmavin, imey, isek guwavin, ikow inow, isek inan.

¹²Yon navamul iliganes, ineis, ikawes won Yon, inawes idibwanis. Ikous, inekes Yeisuw, ikamteles sinap towen.

Yeisuw ivakamus gamag kweinim tawsan

(Mak 6:30-44; Luk 9:10-17; Yon 6:1-14)

¹³Yeisuw iligen sinap towen, ilisawes gamag babaw, itouw wawag, ikalavis ineis ven makaw waseg. Gamag babaw iliganes livanen bo itouw, ilisawes siven kweitan, inoys gog waked, ikikuns Yeisuw waseg.

¹⁴Yeisuw ilug, ikin gamag singay babaw, ikalin nuwan, takatouns ivag mo ibweins.

¹⁵Iwwotet ee... kwayav; navamul inekes, ilansa, “Bo ikwayav, kwayabes gamag babaw bineis waven mwasanin biyamiyises kaeis, peinan nawoud towen nag kweitan ven nises.”

¹⁶Yeisuw gog ikayuses, ilana, “Awoum bineis. Kusekes kaeis beikams.”

¹⁷Ilansa, “Kan nag. Misinaka bled kweinim, in mwanay.”

¹⁸⁻²⁰Ilana, “Kumeyes bakin; gamag babaw bisinis awuyow wakunuwatan, beikams.” Ikow bled son in wanaman, ikin wanakaew, ikalin nuwan waseg Yowbad, mo initoug. Ikous mo ikikiv bled issekis navamul, ikawes ivakamus gamag babaw, ikams, ikamuweips. Kan nikambwages isiyavis, idagis in wanuwan kaynad; bo ikalawt kaynad sinawatan kadiney.

²¹Gamag siyas neikams kweinim tawsan tawaw, sisiyas vinay gamagal babaw.

Yeisuw inoun wakunuwatan yevagam

(Mak 6:45-52; Yon 6:15-21)

²²Ikous, mo idibakes navamul, ilana, “Kutouws kumugwas, kusupels kuneis palatan; yey gog bases bakayabes gamag.”

²³Ikayabes ikous, ikatulag in wəkoy, anmwānet binitoug Yowbad waseg. Bo iboug anmwāneta ises.

²⁴Tasiyas gog wāwag kadiveiyov-o wabwanit ikallāvis, bo ikalālāv nimes, peinan yag meinoy neim wantes.

²⁵Kakita beiyam, Yeisuw mo inoun wakunuwatan yevagam, bo binekes.

²⁶Navamul ikines Yeisuw ininoun wakunuwatan yevagam, idokes yeiluw kid, iwkuwaksa aspwayat.

²⁷Yeisuw ilana, “Bwein-wan! Awoum beivag amipwayat. Yey nases.”

²⁸Iw to Pita, ilana, “Guyaw, magat moundid yākoum, kudibakeig baw, mo banoun wakunuwatan yevagam, bawekeim.”

²⁹Yeisuw ilana, “Kum.” Pita mo ilisow wag, inoun wakunuwatan yevagam binek kid Yeisuw.

³⁰Igaw ininoun, ikin yag itotow, anpwayat, kaken bo isoun, kakita bo bimukul. Iwak, ilana, “Guyaw kwatinabweig!”

³¹Yeisuw iyasel naman, iyous, ilana, “Adok nag kusimounid waseg yey. Aveiyag wawun ivag nanoum akweiy?”

³²Iyums asteiy inekes tasiyas wāwag, itouws, yag mo iyenom. ³³Tasiyas wag aniwnataw mo ikululs wamatan Yeisuw, ilansa, “Mounid Yowbad Natun yak.”

Genesalet gimgilis ivag mo ibweins

(Mak 6:53-56)

³⁴Isupels, ilugs ven yagan Genesalet.

³⁵⁻³⁶Min-Genesalet iwtusis Yeisuw, ikayabes sisiyas, ineis vena babaw, idibakes takatouns, ilansa, “Kwatuyouns kunekes Yeisuw.” Inekes, initougs waseg, sivines kid misinaka bikabkwanes matan anakweim. Itam, ikabkwanes, mo ibweins.

Tammwayas sikaleiwag

(Mak 7:1-23)

15 ¹⁻²Tasiyas Palisiy mwasanin sisiyas takatimlakeins kaleiwag mwasanin mo ilisawes Yelusalem, imekes Yeisuw, ilansa, “Aveiyag wawun muvumul isiplaves tammwayas sikaleiwag, peinan beikams kan tage nag iwidis nimes?”

³Ikatimop asilivan, ilana, “Yakamiy-vak, aveiyag wawun kunuwes amikikun, mo kusiplaves Yowbad nakaleiwag?”

4 “Yowbad nakaleiwag mamagina:

‘Kuvnases tamam inam’, o

‘Kukin kal biyeg taman o inan tonen, mo kuweiyis gamag towen.’

5 “Tage yakamiy amisinap, kulansa;

‘Aveiyag bukusekes tamam inam, bweina bukwatibom silmanin
Yowbad, mo bukwangwayes tasiyas.’

6 “Amisinap towen waseg kugidamis Yowbad nakaleiwag.

7 “Tayyaweids yakamiy! Mounid palopit towen Isaya nilivnek livanen
yakamiy, peinan ilel Yowbad anilivan mamagina:

8-9 ‘Gamag siyas wudous waseg ivnaseigs, tage ninous waseg isinleigs.

Makava itapwalouls waseg yey, peinan gamag mwasanin asisinap
ikatimlakays, tage agusinap yey bo ipiyaves.’”

10-11 Mapuna Yeisuw idawes gamag babaw bimeis. Imekes Yeisuw,
ilana, “Kuliganes mo bukukwakins. Aveiyag beisiw awn waseg nag
biyageg gamag kululuwan, nag. Misinaka sinap towen bisap wawadon mo
biyageg gamag.”

12 Tut wankuyeim navamul inekes Yeisuw, idibakes, ilansa, “Tabta
kukwakin siyas Palisiy asimwasin amlivan to nukulivan?”

13-14 Yeisuw ikabebay, ilana, “Tamag walbalab nisop kay bwanabwein;
tage kay tobwag nitatos. Tamag mo bigut kay siyas, bilev. Townen
nakaleiwag, yakamiy nag. Tasiyas mamagina toukwaws imgwayes
sisiyas toukwaws, bitokes sisiyas binawes, babaw mo bikalkalouws bineis
waleg.”

15 Pita ilana, “Kulik kabebay towen vagan silawun bakakakin.”

16-18 Yeisuw ilana, “Adok yakamiy-vak igaw tatagouwaws yakamiy.
Tabta kukwakins avei-kan beikoum gamag, kan towen bein watoubun,
bininoun ee... igaw simwan mo bisap bein wamnats? Tage aw-sinap gamag
binuway wananon, igaw mo bilivan, anilivan towen bisap wawadon mo
biyageg gamag kululuwan.

19-20 “Gamag nanon waseg sinap kalbaleb, katumat gamag, subwan,
kaylas, veinaw, yaweid, yagay. Sinap siyas gamag wananon bisap mo
biyageg gamag towen. Tage nag biwid naman mo beikam, sinap towen
nag biyageg gamag, nag.”

Vinen-Kenan inamis Yeisuw waseg

(Mak 7:24-30)

21 Yeisuw ilisow ven towen, inoun in walasin ven Tayil o Sidon.

22 Natan vin nag vinen-Yudiy, tage vinen-Kenan, isap, iwak, ilana, “O
Guyaw, Deibid tabun yak, kusiwyoubug, peinan natug kudavin yeiluw
singay iyageg.”

23 Yeisuw gog ikapay, nag ikatimop anilivan, nag. Navamul mo iwekes,
ilansa, “Kwayeb nawen iwkuwak, bo iwegweis wom.”

24 Yeisuw ikatimop ages, ilana, “Yowbad nikayabeig nam silmanin nagamag min-Yisleil, peinan mamagina sip tasiyas, ilassulis ked.”

25 Manawen vin im, ikulul wamatan, ilana, “O Guyaw, kulabeig.”

26 Yeisuw ikabebay, ilana, “Awoum bakow gamagal kaeis, basekes awuk beikams, awoum.”

27 Iw manawen vin, ilana, “E, mounid. Tage gamagal beikams, musamusan kan bikalkalouw bininein waskawan teibol, bweina beikams mansiyas awuk puskekel, waskawan teibol nisesus.”

28 Yeisuw ikatimop aygan, ilana, “Vin yak, singay kunmiseig vagan balabeim. Mukwanitoug waseg yey avanin mo bikamat waseg yak.” Mapuna natun ibwein tut townen waseg.

Takatouns babaw ivag, mo ibweins

29 Yeisuw inoun, in, ivvayal yevagam avakaein yagan Galiliy, mo ikatulag in wakoy, isin.

30 Singay babaw gamag inekes sisiyas takatouns babaw, takagayals, toukwaws, tasiyas ipam kikeis o nimes, o takakons. Takatounsa babaw inawes isewas wamatan Yeisuw, ivag mo ibweins.

31 Gamag babaw ikines tasiyas takakons, ivag mo ilivans bwein; tasiyas ipam kikeis o nimes ivag mo idamoms; takagayals ivag mo inounas; toukwaws ivag mo ikins bwein; isom ninous, iyakawns waseg min-Yisleil siYowbad.

Yeisuw ivakamus kweivas tawsan tawaw

(Mak 8:1-10)

32 Wankuyeim Yeisuw idawes navamul, inekes, ilana, “Inok nuwag gamag babaw asimoun, kweitoun yam sigwey tasiyas nitasesus, kaeis nag beikams. Adok awoum bakayabes sona asimoun, bo bisiwsawoul wous waked.”

33 Iweis navamul ilansa, “Ven townen makava nawoud, avanuy bakaban kaeis tasiyas babaw gamag beikams?”

34 Yeisuw ikatiganes, “Kweivin amibled?”

Ilansa, “Kweinim kweiy son in mwanay kekel-e.”

35-36 Idibakes gamag babaw, ilana, “Kusinis.” Isinis, ikow bled townen son in, initoug, ikalin nuwan Yowbad waseg, ikikiv, issekes navamul; navamul mo ikawes ivvageins gamag babaw wasigeis.

37 Asibabaw ikams ikamuweips. Kan townen nikambwages isiyavis, gamwat kweinim kweiy bo ikalawt.

38 Asibabaw tasiyas ikamkwams ikamuweips kweivas tawsan tawaw sisiyas vinay gamagal babaw.

39 Ikous, ikayabes gamag babaw, mo itouw wawag, ikalavis ineis ven avakaein yagan Magadan.

Gamag sivines bikines naman mulin Yeisuw
(*Matiw 12:38-41; Mak 8:11-13; Luk 12:54-56*)

16 ¹Wankuyeim siyas Palisiy sisiyas tasiyas Sadusiy inekes Yeisuw iyakwanes, ilansa, “Kwamtilakem mulin naman Yowbad, bakakin.”

²⁻³Ikatimop asilivan, ilana, “Kwayav waseg kulansa, ‘Libalab ikayibwel, kalas bo beikal,’ o gaboug waseg kulansa, ‘Bwaw beim peinan lov magin mawana musewun kov.’ Yowbad naman mulin tasiyas kuwtusis; tage tut towen waseg Yowbad naman mulin nag kuwtusis.

⁴“Kalbaleb gamag tapiyaveins Yowbad yakamiy, sivinamiy bukukines mulin naman Yowbad. Nag gog; misinaka sinapun Youna bukukines. Nag kweitan mulin naman Yowbad bukukines.” Ilivan ikous, ilisawes, mo inoun.

Tasiyas Palisiy asiyist
(*Mak 8:14-21*)

⁵Ikalavis, italags palatan, navamul bo inumlaves asibled.

⁶Yeisuw idibakes, ilana, “Kumtakavateimiy. Kadiloka kupiyaves tasiyas Palisiy asiyist, o tasiyas Sadusiy asiyist.”

⁷Illivans sisiyas wasigeis, idokes Yeisuw anilivan towen peinan bo inumlaves asibled.

⁸⁻¹¹Yeisuw go ikakina ninous, ilana, “Adok nag kunmiseigs vagan kan basekeimiy bukukwams. Mata kudokes silawun agulivan bled tatonen peinan kunumlaves, nag. Adok nag kunuwes kweinim tawsan tawaw neikams bled kweinim waseg mo kusiyavis kaynad babaw, o nag kunuwes kweivas tawsan tawaw neikams bled kweinim kweiy mo kusiyavis gamwat babaw. Silawun agulivan nag bled tonen. Aveiyag wawun nag kukwakins? Vayuwein badibakeimiy, ‘Kadiloka kupiyaves tasiyas Palisiy asiyist, o tasiyas Sadusiy asiyist.’ ”

¹²Mo ikakins anilivan nag livanen yist tatonen, silawun gog tasiyas Palisiy o Sadusiy sikatimlakay, kadiloka bipiyaves.

Pita ikakin kavel Yeisuw
(*Mak 8:27-30; Luk 9:18-21*)

¹³Yeisuw inoun in walasin ven yagan Sisaliy Pilipay, ikatiganes navamul, ilana, “Gimgilitoun yey, gamag mwasanin idokes kavel yey?”

¹⁴Iweis tasiyas, ilansa, “Mwasanin idokes yakoum tabibaptaysein gamags Yon yakoum, mwasanin gog idokes yakoum kid Ilaytiy yakoum, mwasanin idokes yakoum Yelemay o teitan palopit kweiboug nukuyum nukum kid.”

¹⁵Ilana, “Tage yakamiy, kudokeigs kavel yey?”

16 Saymon Pita ikatimop, ilana, “Yakoum Mesay yakoum, Tamwamov Yowbad Natun yakoum.”

17 Yesuw ilana, “Tammwasaw yakoum Saymon, Youna natun yakoum; bo nukuwtusig, nag ven watinow gimgilis ikatimlakeims, nag; tage Tamag walbalab nikatimlakeim. O yey mo balivan badibakeim:

18 “Yakoum Pita, wawun yagam “Dakul” o dakul towen wakunuwatan mo bawlul agugwamag mamagina gunbunatum yakamiy, o kanig nag bitawtoun wasigeis yakamiy tayakelesiys.’

19 “Yowbad nakaleiwag anakiy mo basekeim yak. Aveiyag kuyawen ven watinow, Yowbad mo biyawen walbalab, o aveiyag bukulik ven watinow Yowbad mo bilik walbalab.”

20 Ikous anilivan towen, idibakes navamul, ilana, “Awoum kukwamats sinap towen. Awoum teitan gamag bikakin yey Kelis Mesay, yey. Awoum.”

Yeisuw nilivnek vagan bikakins bikanig mo beikit vayuwein
(*Mak 8:31–9:1; Luk 9:22-27*)

21 Tut towen Yeisuw isilamaw anilivan kweitan, vagan navamul bikakins, ilana, “Kadiloka ban Yelusalem, biyagageigs singay tammwayas sisiyas tanuwgwes lun situwawek o takatimlakeins kaleiwag; ikous mo beiweigs, bakanatoun mo bakit vayuwein.”

22 Pita iligen livan towen, itok Yeisuw, ineis palatan, ilana, “Yakoum Guyaw, awoum kulivan mawan. Awoum biyagageims mawan sinap towen nukulivan.”

23 Iw to Yeisuw, idibek Pita, ilana, “Kusineikik yakoum Seitan. Awoum kusilbwadeig. Amsinap towen meinoy neim gamag sikanuway waseg; Yowbad ansinap kweitan.”

24 Yesuw mo idibek navamul, ilana, “Kal yak bukubkunig, kadiloka bukupiyev nanoum tatoneim, bukukow amklos vagan bukukwanig kid, mawan magin yey bo bakanig. E, makadewen ked waseg bukubkunig yey.

25 “Kukin bukwayus mwamovam, bo biyamkwaneim. Kukin gog biyamkwen mwamovam peinag yey, igaw mo bukuban.

26 “Youd babaw bitayous ven watinow, tage mwamovads bigeg, bo bigak! Peinan ta-mawan gamag bivkek bisen mwamovan sivyuwein.

27 “Igaw Gimgilitoun yey mo bakam sigwey guntakayobs, o Tamag inakamnat waseg, mo maysan miwotet basekeimiy katanok katanok yakamiy.

28 “Mounid adibakeimiy mwasanin yakamiya-nan nag bukulivatus kanig ee... mo bukukineigs Gimgilitoun yey igaw bam, gunakaleiwag mo bisilamaw ven watinow.”

Ankakin Yeisuw ivag kamnat

(Mak 9:2-13; Luk 9:28-36)

17 ¹Yam kweinim katanok ikous, Yeisuw itokes Pita siney asteiy, tasiyas Yemes son bwadan Yon; ikatulags ineis wakunuwatan koy avakaein; asteivas isiwas.

²Wantes ivag ankakin kweitan, magin ikamnat maʷana kaʷas mititeilin, anakweim ilapupwakaʷ singay gimagim.

³Mo ikines Moses son Ilaytiy illivans sisiy Yeisuw.

⁴Iw to Pita, idibek Yeisuw, ilana, “Guyaw, singay bwein tasesus towen. Magat sivinam mo bawlul mibwan bunatoun, bunatan yak, bunatan Moses, bunatan Ilaytiy.”

⁵Igaw ilivan, lov kweitan singay kamnat mo imteilis, aygan teitan wanuwan lov ilana, “Mtowen Natug bwanabwein, singay ibwein nanoug waseg; kuliganes aygan.”

⁶Navamul iliganes livan towen, ikalouws kantukovs, singay aspwayat.

⁷Yeisuw gog im ikabkwen wous, ilana, “Kutamanaws. Awoum beivag amipwayat.”

⁸Itamanaws, ikinewas, nag ivag gamag, misinaka Yeisuw.

⁹Igawa iwwloubus, Yeisuw mo idibakes, ilana, “Awoum kwamteles sinap towen nukukines. Kwawumes. Igaw Gimgilitoun yey bakanig, baʷit vayuwein, mo kwamteles.”

¹⁰Navamul ikatiganes, ilansa, “Aveiyag wawun takatimlakeins kaleiwag ilivans, ‘Ilaytiy wanamug beim, Mesay wankuyeim?’”

¹¹⁻¹²Iw to Yeisuw, ilana, “Mounid livan towen ‘Ilaytiy beim mo bikatilow youd babaw’; tage bo neim. Tasiyas gog nag iwtusis; tage sivines beiweiy-wan, mo iyagages. Igaw mo biyagageigs yey, Gimgilitoun yey, bo maʷan.”

¹³Navamul mo idumwal ninous, peinan ikakins-wan tabibaptaysein gamags towen Yon mamagina Ilaytiy.

Gwad takabaʷaʷein Yeisuw ivag, mo ibwein

(Mak 9:14-29; Luk 9:37-43)

¹⁴⁻¹⁵Ikous, inounas, inekes gamag babaw, teitan taw im, ikulul wamatan Yeisuw, ilana, “Guyaw, binok nuwam natug, peinan ikabaʷaʷein, ankatoun avakaein. Tut babaw ikalkaʷalouw ininein waʷkov, tut babaw ikalkaʷalouw ininein wayvagam.

¹⁶“Awey natug muvumul wasigeis; iyokons bo nag.”

¹⁷Yeisuw idibakes tasiyas, ilana, “Takakons yakamiy, minamis nag. Bo akawgwes amisinap kakon. Kumey gwad towen.”

¹⁸Yeisuw idibek yeiluw towen neiweiy gwad, mo ikilev. Gwad towen mo ibwein, tut towen waseg.

¹⁹Navamul mo inekes Yeisuw anmwānet nises, ikatugwans, “na-ikadilokem bakakayeb yeiluw towen?”

²⁰⁻²¹Iw to Yeisuw, ilana, “Peinan nag kunmises Yowbad vāgan bivag. Mounid adibakeimiy, magat minamis mamagina tipol veitun, igaw bukudibek koy towen kulana, ‘Kunoun kun kutoun palatan,’ mo binoun; e, sinap babaw mo bikadilokeimiy.”

Yeisuw ilivnek bikanig, mo beikit vayuwein

(Mak 9:30-32; Luk 9:43-45)

²²⁻²³Igaw nisesus Galiliy, Yeisuw idibakes, “Teitan bisilkodeig yey, Gimgilitoun yey; gamag mwasanin mo biyousigs, bikatimateigs, yam kweitoun mo bākit vayuwein.” Iliganes, singay ikalin nuwes.

Simoney ibānes wanuwan in

²⁴Inounas ineis Kapaneyum. Iweis tasiyas takaweins takis (takis towen silmanin Yowbad nabunatum), ikatugans Pita waseg, ilansa, “Tabta mutovek itam natakis issekem, o nag?”

²⁵Pita itam, ilana, “Oo!”

Pita iyum in wasibunatum. Iw to Yeisuw, ilana, “Saymon, wananoum yak, takaleiwags ven watinow nitsiyas bipayins wasigeis timsiyas? o tobwag gamag bipayins adok?”

²⁶⁻²⁷Pita ilana, “Tobwag gamag.”

Iw to Yeisuw, ilana, “Mounid. Nitsiyas nag bipayins, nag. Tage bweina bitapayin silmanin Yowbad nabunatum; mata ge bigeg ninous tasiyas. Kun kuksikous, in wanamug bukukous, kukin wanuwan mo bukuban idamoney, bo ikadilok idatakis aditeiy. Kukow kusekes takaweins takis tasiyas.”

Kal bimug Yowbad nakaleiwag wanuwan

(Mak 9:33-48; Luk 9:46-48; 17:1-2)

18 ¹Mitiyamun towen navamul inekes Yeisuw, ilansa, “Kal bimug Yowbad nakaleiwag wanuwan?”

²⁻³Mapuna Yeisuw idouw gwad teitan beim. Im to gwad, Yeisuw itamnow gwad towen wanuwein, ilana, “Mounid adibakeimiy, kukin bikanavin ninoumiy bukumlavags māwana gwad towen mo bukusiws wanuwan Yowbad nakaleiwag. Kukin gog nag, bo nag.

⁴“Kal yak bukumānum māwana gwad towen, igaw bukumug Yowbad nakaleiwag wanuwan.

⁵“Kukin bukuleb gwad teitan nisimounid waseg yey, magina bo kulabeig yey.

⁶“Gamagal tasiyas isimounids waseg yey, kukin kal bikatsilakes silmanin bikakins sinap kalbaleb, singay kalbaleb bilouvat gamag towen.

Kukin gamag mwasanin bikawes dakul avakaein biyawanis kayon bo bilaves bein wabwanit, biw gwel, nakalbaleb townen kalamwey; tage kukin bisesuna ee... bikatsilek teitan gwad, singaya kalbaleb mo bilouvat.

⁷“O bo igak! Peinan tasiyas takalbalebs ikatsilakes gamag ven watinow. Gamag mwasanis bisilbwades sinap bwein, mo gamag babaw bilivatus kalbaleb. Ven watinow inakaleiwag māwan. Tage tasiyas bisilbwades sinap bwein, igaw singay kalbaleb mo bilivatus.

⁸“Kukin namam o kakeim bikaleiwag amsinap kalbaleb, kubob kulev. Bweina biyamkwen namam o kakeim, igaw mwamovam bukuban; awoum kid namam paleyun-wan o kakeim paleyun-wan igaw bilaveim bukun wanuwan kov townen nakagdated nag beikous.

⁹“Māwan-vak matam. Kukin matam bikaleiwag amsinap kalbaleb, kugut kulev. Bweina biyamkwen matam palatanok, igaw mwamovam bukuban; awoum kid paleyun-wan igaw bilaveim bukun wadiginasim, kov nigidaged waseg.

Awoum kwasigumis gamagal

(Luk 15:3-7)

¹⁰“Awoum kwasigumis gwad teitan peinan igaw takakit; mound adibakeimiy anelos tasiyas ililabes gamagal tut babaw sisiy Tamag walbalab; ikikines magin. ¹¹(-)

¹²⁻¹³“Kuninuways kavel alen sip lakatutan, mwantanok gog bilasisul ked bikanig, adok tanuwagan mtowen tamtakavatein bilisawes mansiyas sip sinawanim sinawawas mwananim mwanawas wākoy bisesus, binineiv gog manāwen nikanig. Igaw biban, mound bimwasaw avakaein silmanin; tage inamwasaw kakit wasigeis mansiyas sip nisesus bwein wākoy. Tanuwagan nag ivag sivinan biyamkwen mwantanok sip.

¹⁴“Tamag walbalab māwan; nag ivag sivinan biyamkwen gwad teitan, mamagina tasiyas.

Towen soum tayagageim yak

(Luk 17:3)

¹⁵“Kukin soum biyagageim, kunek kwatimlek ansinap kalbaleb. Amiteiy kulivans. Awoum gamag babaw biliganes. Kukin biligen amlivan bo bwein, peinan bukumwas soum bwadam townen.

¹⁶“Kukin gog nag biligen, soum teitan o simwey asteiy kunekes bwadam townen, kulivans waseg vāgan kid bisimounid amlivan meivek-wan.

¹⁷“Kukin bipiyev amlivan, mo kuneis kudibakes tayakelesiys, tasiyas babaw mo bilivans. Kukin bipiyev tayakalesiys asilivan, bweina kudok gamag townen tadadub, o magina takawein takis, kalbaleb gamag townen.

¹⁸“Mound adibakeimiy tayakelesiys yakamiy, aveiyag bukuyawanis ven watinow waseg, Yowbad mo biyawen walbalab. Aw-kaleiwag bukulikis ven watinow, Yowbad mo bilik walbalab.

19“Vayuwein adibakeimiy, kukin amiteiy ven watinow kusesus, igaw bukutams aw-youud bukunitougs waseg Tamag walbalab Tamag mo beitam, bisekeimiy youd townen.

20“Avanuy kwatuyouns amiteiy o amiteitoun silmanin gunawotet, simiy yey mo bitasesus, yey agugwamag yakamiy.”

Teitan nag biwid son nakalbaleb

21Iw to Pita, ikatigan Yeisuw, ilana, “Guyaw, sivaṽin soug biyagageig, mo bawid ansinap kalbaleb, banumlev? Adok sivaṽanim sivay, ne?”

22Yeisuw ilana, “Nag sivaṽanim sivay. Deisa lakatunim lakatuy sinawanim sinawey mo sivaṽanim sivay.

23“Mapun bakabebay mo bukukwakins Yowbad nakaleiwag; peinan maṽwana guyaw teitan ititaṽay wasigeis inagamag.

24“Itokes teitan gamag imeyes, nakawlavag singay avakaein, sinawatan tawsan kina, ilana, ‘Gunmoney nag. Igaw wanakougwaw mo bamop waseg yak.’

25“Natovek ilana, ‘Nag. Igaw teitan gamag beim bisekeig maysamiy soum mukwaw o nitum, bitokeimiy bukuneis kuwotets townen nawotet, maysamiy money bo bakow kadilok mukwawlavag.’

26“Taw townen mo ikulul igilagel, ilana, ‘Binok nuwam yey, igaw mo bamop gunakawlavag babaw, beikous.’

27“Iyakalin guyaw townen, ilik nagamag, iwid nakawlavag ikous, ilana, ‘Deisa kunoun. Bo awid mukwawlavag.’

28“Inoun taw townen, iban son, peinan asteiy iwteles sitovek nawotet, ilana, ‘Mukwawlavag waseg yey lakatutan toya.’ Deisa iyous kayon son, ilana, ‘Nuwanaw kusekeig.’

29“Son mo igilagel, ilana, ‘Binok nuwam yey, igaw mo bamop gunakawlavag babaw, beikous.’

30“Townen ikayus, itok son, isen wanuwan deil, ilana, ‘Deisa kuses wadeil. Igaw bukumop mukwawlavag mo bukun wamnat.’

31“Iliganes sisiyas, tasiyas tawteleins guyaw nawotet, singaya igeg ninous tasiyas, inekes sitovek townen, youd babaw ikamteles ikous.

32-33“Sitovek idouw mtowen beim. Im, natovek ilivan, ‘Singay takalbaleb yakoum. Nukugilagel to nawid mukwawlavag meivek-wan. Inok nuwag yak, tage nag inok nuwam soum. Bo igak!’

34“Kapasal nuwan, idawes tamtakavateins deil, ilana, ‘Kutokes gamag townen, kunawes wadeil, bises oko igaw bimop nakawlavag beikous, mo kein wamnat.’

35“Tamag walbalab ansinap maṽwan. Kal yak wananoum ta-bukuwid simwey sikalbaleb waseg yak, Yowbad bo bimop ansinap kalbakeb yakoum.”

Peiyaw mikwawas o mimwanas wasigeis

(Mak 10:1-12)

19 ¹Anilivan tasiyas ikous, Yeisuw ilisow Galiliy, inoun in min-Yudiy siven palata-dadan lay yagan Yoldan.

²Singay babaw gamag ikatukuns waseg; inekes Yeisuw, ven townen nises, takatouns ivages mo ibweins.

³Tasiyas Palisiy mo inekes Yeisuw, iyakwanes, ilansa, “Tab kadiloka bakapiyev makwawas peinan asisinap mwasanin kalbaleb?”

⁴⁻⁶Yeisuw ikatimop asilivan, ilana, “Tabta kuvinis livanen Yowbad, peinan kweiboug nibun gamag, kudataw kudavin, mo ilana. ‘Peinan kudataw kweitan, kudavin kweitan, kadiloka kudataw bilisow taman inan, bikatuvases son nakwav, asteiy bimlavags mamagina wous katanok-wan.’ Peinan Yowbad anilivan mawan, taveivays asteiy wous nag akweiy, bo katanok-wan. Peinan Yowbad bo ilaten, awoum gamag teitan biliv bisenas palatan palatan; awoum.”

⁷Ilansa, “Magat kaleiwag townen moundid, aveiyag wawun Moses nakaleiwag vagan kid townen tapiyavein nakwav bilel inalet bisek, bikayeb, mo beiyum bein wanven?”

⁸Iw to Yeisuw, ilana, “Kweiboug nag kweitan ked vagan gamag bipiyev nakwav. Wankuyeim gamag siyas takakons, to Moses isekeimiy miked waseg bukupiyaves mikwawas.

⁹“Moundid adibakeimiy kukin kal bipiyev nakwav, mo natan bikow, ansinap townen kalbaleb, magina ikanavaya mav. Misinaka nakwav bimasis son teitan taw, namwan mo bipiyev.”

¹⁰Navamul ilansa, “Magat veivay kaleiwag-nen bo mawan, adok awoum bitaveivays.”

¹¹⁻¹²Yeisuw ilana. “Gamag babaw nag bikakins kaleiwag townen. Misinaka Yowbad ansinap bisekes gamag mwasanin, mo bikakins. Peinan tawaw mwasanin tutan insiyas nikopwes-yay powes nag, o tawaw mwasanin powes nag peinan gamag ikablaves, o gamag mwasanin ikablaves powes tatineis vagan bikanawes Yowbad nakaleiwag. Kal yak bukukwakin sinap townen, bweina kuligen.”

Yeisuw sivinan gamagal

(Mak 10:13-16; Luk 18:15-17)

¹³⁻¹⁴Mo imeyes gamagal, sivines Yeisuw bituwanis wanaman, mo binitoug pines. Navamul bikayabes kid, Yeisuw ikayuses, ilana, “Awoum kwayabes. Bweina bimeis waseg yey, peinan Yowbad nakabkaleiwag wanuwan tasiyas babaw asisinap mawana gamagal.”

¹⁵Bo ituwanis ikous, mo inoun.

Guyawaw sikabeisiw Yowbad nakabkaleiwag waseg singaya keikay
(Mak 10:17-31; Luk 18:18-30)

16 Teitan gamag inek Yeisuw ilana, “Tamwey, aw-wotet bwanabwein bawtel mo baban mwamovag nag beikous?”

17 Iw to Yeisuw, ilana, “Aveiyag wawun kwatiganeig silmanin sinap bwein? Anmwanet nises ansinap bwein. Magat sivinam mwamovam nag beikous, kadiloka kuvnas nakaleiwag beibwein.”

18-19 Ilivan, “Aw-kaleiwag?”

Yeisuw ilana, “Tasiyas: Awoum kuweiy gamag; awoum kwanavay mav; awoum kuveinaw; awoum kuyaweid, teitan gamag livanen; kuvnases tamam son inam, kwanow ages; o kuvnas soum mawana kuvnaseim tatoneim.”

20 Toubwat towen ilana, “Kaleiwag siyas babaw bo ayakous. Aveiyag nikabwag waseg yey?”

21 Iw to Yeisuw, ilana, “Magat sivinam sinap bwein bukuyakous, kun kuymiyis muvavag babaw, money kukow kunow, kuvgen tasiyas tasimavs wasigeis, igaw Yowbad mo biyamiyiseim walbalab. E, mumoney kuvgen beikous, mo kum kwabkunig yey.”

22 Toubwat towen ikatiligen anilivan, ipiyev, peinan ikayus nawliyoug, singay babaw; bo ige nanon, inoun.

23 Yeisuw mo idibakes navamuls, “Singay keikay guyawaw sikabeisiw wanuwan Yowbad nakabkaleiwag.

24 “Vayuwain badibakeimiy, man avakaein manawen kamel kalamwey keikay beisiw vas wawawun; tage guyawaw singay keikay beisiw wanuwan Yowbad nakabkaleiwag.”

25 Inavamul iliganes, isunasun ninous, ilansa, “Magat tasiyas nag, kalisiy mo beisiws?”

26 Yeisuw ikines tasiyas navamul, mo ilana, “Gamag yakamiy wasigeis nag kadilok, tage Yowbad waseg youda babaw bo ikadiloken-wan.”

27 Pita mo ikatugan, ilana, “Yakamey bo nakapiyev mavavag babaw, tage bo nakabkunim yak, aveiyag yakamey bakalouvat?”

28 Yeisuw ilana, “Mounid adibakeimiy, yakamiy nukubkunigs yey, igaw tut wanakougwaw, Gimgilitoun yey basin abag bwanabwein waseg, yakamiy bukusinis wakabamiy sinawatan akweiy bukwaleiwags wasigeis min-Yisleil adakums sinawatan akweiy.

29 “E, kalisiy yakamiy kulisawes mibunatum, tawlimiyas, timmiyas, inmiyas, nitimiyas, o mipwepway vagan bukukwawes gunawotet, atimapun tasiyas singay babaw bukubanes son mwamovamiy nag beikous.

30 “Gamag babaw nimugwas igaw bikuyeims, o tasiyas nikuyeims igaw bimugwas.

Tawteleins bag

20 ¹⁻²“Yowbad nakaleiwag māwana teitan taw, inaven avakaein. Iyam gāboug ikit, iliwon wawtakon ven, ilana, ‘Gunawotet nises, gunabag, bukuneis kuwotets katanok yam, maysan wotet katanok kina, igaw mo basekeimiy.’ Itams mwasanin, inounas ineis wanabag.

³⁻⁵“Wankuyeim, k̄alas bo italḡalag, in waven, iban gamag mwasanin isimavs. Ilana, ‘Kuneis, kuwotets gunabag. Igaw maysan mo basekeimiy.’ Mo itams, ineis. Wankuyeim, yanay, iban gamag, ilivan māwan, mo ineis, iwotets wanabag. Wankuyeim k̄alas itageg, iban gamag, ilivan māwan, mo ineis.

⁶“Babaw gamag iwotets ee... kakita beiboug, tamwey towen in waven, iban gamag mwasanin, ilana, ‘Aveyag wawun makava kusesusa bo iboug?’

⁷“Iweis tasiyas, ilansa, ‘Peinan ta-kal bisekem mawotet.’

Ilana, ‘Yakamiy-vak kuneis, kuwotets gunabag.’

⁸“Iboug, taginbag idibek natouwat, ‘Kudibakes tawteleins bag bimeis, maysan siwotet kusekes. Kusilamaw kweivaw gamag tasiyas mwana nimeis, mayses kusekes. Ikous, mo tasiyas kwayav nimeis. Māwana bein ee... nakabiyokous tasiyas gāboug nisilamaws.’

⁹“Tasiyas kweivaw gamag nag bivakaein siwotet, imeis, wotet maysan mo ikawes katanok kina.

¹⁰“Siyas gog gāboug nisilamaws, idokes kid avakaein mayses bikawes. Nag gog, katanok kina. Meiveka gamag mayses bo katanok kina.

¹¹⁻¹²“Mayses ikawes, ivtokes livan tamwey towen, idibakes, ilansa, ‘Tasiyas nag bivakaein siwotet mayses bo katanoka māwan yakamey. Yakamey gog nakawotet k̄alas midamed. Gāboug nakasilamaw kawwotet oko iboug.’

¹³⁻¹⁵“Tamwey ikatimop aygan teitan, ilana, ‘Gwa, nag ayagageim, nag. Gāboug agulivan bo kutams: Katanok yam katanok kina. Mukina towen-an kukow kunow. Sivinag basekes kweivaw gamag siyas māwana yakamiy. Kadilok yey bakaleiwag gunavavag waseg. Awoum bimouvit dabam peinan agusinap bwein.’

¹⁶“Siyas nimugwas igaw bikuyeims, o tasiyas gog nikuyeims igaw bimugwas.”

Sivtounun ilivnek bikanig mo bitamanaw vayuwein

(Mak 10:32-34; Luk 18:31-34)

¹⁷⁻¹⁹Ikous, mo inounas, bikatulags kid bineis Yelusalem. Wāked Yeisuw idibakes tasiyas navamul, ilana, “Bo bitakatulags taneis Yelusalem, teitan gamag mo bisilkodeig Gimgilitoun yey, mo biyousigs tasiyas tanuwgwes lun situwāvek sisiyas takatimlakeins kaleiwag, biyateleigs

vagan bikatimateigs, igaw mo bitameigs wasigeis tobwag ven gimgilis Yelusalem nisesus; tasiyas bisibaweigs, biwaweigs, bikatkaviteigs waklos. Yam kweitoun mo batamanaw vayuwein.”

Yemes son Yon initougs waseg Yeisuw

(Mak 10:35-45)

²⁰Iweis nāwen Sebediy nakwav, siney nitun tawaw asteiy, manāwen ikulul wamatan Yeisuw, binitoug waseg.

²¹Yeisuw ilana, “Aveiyag sivanam?”

Iw manāwen ilana, “Kukwaleiwag vāgan kid igaw bukuguyaw, nitug siyas-nan bisinis wadadam, teitan wamkwatay, teitan wamkimaw.”

²²Yeisuw ikatimop asilivan, ilana, “Nag kukwakins mikanitoug towen. Tab kadiloka bukumoums agukwāvig to bāmoum?”

Ilansa, “Bo kadilokem.”

²³Idibakes, “Mounid bukumoums agukwāvig, tage na-ikadilokeig bakaleiwag kavel bisin wagunkatay o wagunkimaw, nag. Tamag gog bo ikatineg abes tasiyas bisinis wagunkatay o wagunkimaw, mtowen takaleiwag.”

²⁴Yeisuw navamul tasiyas sinawatan mo iliganes sikanitoug asteiy son bwadan bo ikawkunes.

²⁵⁻²⁷Yeisuw gog ikakin asisinap, idawes bimeis. Imeis mo ilivan, “Kukwakins ven babaw guyawuns asisinap, keikay wudous; o sikaleiwag tawtoun wasigeis. Yakamiy gog amisinap kweitan. Kukin kal sivanan biguyaw wasigeis yakamiy, bweina bimlavag mitouwat; o kal sivanan bimug, bweina beibus māwana tasimav, bikokew miwotet.

²⁸“Yey gog, Gimgilitoun yey, agusinap māwan. Yey nam, mata ge kulabeigs; deisa balabeimiy. Kaleivig bo atam maysamiy tababaws yakamiy.”

Toukwaws asteiy ivag mo ikins bwein

(Mak 10:46-52; Luk 18:35-43)

²⁹Wankuyeim waked ininounas, bo ilisawes Yelikow, singay babaw gamag ikatukuns Yeisuw waseg.

³⁰Tasiyas toukwaws asteiy isinis wadadan ked, bo iliganes livānen Yeisuw, peinan bo neim. Iliganes, mo iwaks, ilansa, “Deibid tabun Mesay yakoum, binok nuwam yakamey.”

³¹Asibabaw ilansa, “Kukwāpays yakamiy!” Tasiyas gog isimkakinsa waseg, ilansa, “Guyaw, Deibid tabun yak, binok nuwam yakamey.”

³²Yeisuw itoun, mo idawes tasiyas bimeis, mo ilana, “Aveiyag sivanamiy bavag wasigeis yakamiy?”

³³Ilansa, “Guyaw, kuvag beilal mitem.”

³⁴Yeisuw inok nuwan tasiyas, mo ikabkwen mites, nuwanawa ikins bwein, mo ibwākuns Yeisuw waseg, inounas.

Yeisuw isap ven Yelusalem

(Mak 11:1-11; Luk 19:28-38; Yon 12:12-19)

21 ¹⁻²Inounas ee... kadiykusuan-o Yelusalem, koy towen kay siyas oliv nitatos, ven yagan Betepeig; mo ikayeb navamul asteiy, ilana, “Kuneis ven towen palatan, mo bukubanes donkiy nises, anvatul iyawanis wakayon, son natun nisesus; kulikus, kutokes kumeyes.

³“Kukin kal bikatugwan wasigeis yakamiy, kwatimapus anilivan, kulansa, “Tanuwagan sivinan mansiyas donkiy,’ mo beitam towen.”

⁴Ivages maʋan, mo ikamat livanen Mesay, kweiboug palopit nilivnek, ilel maʋan:

⁵“Kudibakes Sayon vinay-nen, ‘Kukines miguyaw bo beiw, Imwen donkiy watapwan; magina tammanum mtowen neiw, Isin donkiy natun watapwan.’”

⁶Ineis tasiyas asteiy, ikanawes aygan Yeisuw.

⁷Ibanes donkiy son natun, itokes imeyes; inibwis asikweim, isenas watapwan donkiy, Yeisuw imwen, isin wakunuwatan donkiy.

⁸Gamag babaw iyaves asikweim waked; mwasanin gog itateiys amweilok yageivein, iyaves waked.

⁹Tammugwas imugwas, takukuyeims ikukuyeims, asibabaw iwkuwaks, ilansa:

“Kalin nuwem, Deibid tabun yak.

DaGuyaws nikayabeim, nukum vagan bukwatinabwem.

Kalin nuwem Tamads walbalab.”

¹⁰Isiw in Yelusalem, taginvens babaw isisawls imimeis silmanin bikines Yeisuw, illivans, “Kavel mtowen?”

¹¹Tasiyas sisiy Yeisuw ilansa, “Mtowen palopit yagan Yeisuw, gum-Nasalet teitan, inaven wawnuwan Galiliy.”

Ikawsapes tasiyas wanuwan Yowbad nabunatum niggimwals

(Mak 11:15-19; Luk 19:45-48; Yon 2:13-22)

¹²Yeisuw isiw in wanuwan Yowbad nabunatum bunavakaen, mo ikayabes tasiyas niyamiyises sivavag; ikatitan siteibol tasiyas nikatimapus money dakul, o ikatitan abes tasiyas niyamiyises bwabun.

¹³Idibakes, ilana, “Bukitab waseg livanen Yowbad nabunatum nises mamagina:

‘Gunbunatum bikayuses silmanin nitoug;’ tage nukuvages buntuman veinaw.”

¹⁴Igaw nises Yowbad wanbunatum, tasiyas toukwaws sisiyas takagayals inekes Yeisuw; ivag, mo ibweins.

¹⁵Tasiyas gog tanuwgwes lun situwawek sisiyas takatimlakeins kaleiwag ikines Yeisuw, Yowbad wanbunatum, nawotet tawtoun, o

gamagal niwkuwaks ilansa, “Kalin nuwem Deibid tabun yak,” singay mo ikawkunes Yeisuw tasiyas.

¹⁶Ikawkunes, ilansa, “Bo kuligen ages, siyas gamagal?”

Yeisuw itam, ilana, “Oo!” Ilana, “Adok nag kukwakins livanen Yowbad, Bukitab waseg, mamagina:

‘Ninous bo kusekes gamagal sisiyas apwaw, mo iyakawns bwein.’”

¹⁷Mo ilisawes inoun, ilisow ven towen avakaein, inoun in wunkakit, imasis ven towen Betaniy.

Ikawtun yaveinun

(Mak 11:12-14, 20-24)

¹⁸Iyam-nen gaboug iyum in silmanin wunovek, ivag anamoun.

¹⁹Waked iban yaveinun kaytan, iwekey, anagin nag, yageiveina mav, ikawtun ilana, “Igaw nag kweitan anagim beivag waseg yak.” Nuwanaw mo ikaleyag, imat.

²⁰Navamul ikines, isom ninous, ilansa, “Nuwanaw bo ikaleyag yaveinun makaywen! Aw-sinap towen?”

²¹Iw to Yeisuw, ilana, “Mounid adibakeimiy, awoum beivag ninoumiy akweiy. Magat bukunamis Yowbad natawtoun waseg, mo bukuvages mawana yey navag yaveinun; e, bukudibakes koy towen kulansa, ‘Kunoun kun kumukul wayol,’ mo binoun bein bimukul wayol.

²²“Aveiyag bukunitougs Yowbad waseg, kunamis beibwein, mo bisekeimiy.”

Ilansa, ‘Aw-kaleiwag waseg nukuwtel mawan?’

(Mak 11:27-33; Luk 20:1-8)

²³Ikous, inoun in Yowbad wanbunatum, ikatimlakay. Mo imeis tasiyas tanuwgwes lun situwawek sisiyas tammwayas, ilansa, “Aw-kaleiwag waseg kuwtel mawan, o kal isekeim mukwaleiwag towen?”

²⁴Yeisuw ikatimop asilivan, ilana, “Kweitan sinap bakatugan wasigeis yakamiy; e, bukulivans kamnat mo basekeimiy livan kamnat vagan bukukwakins silawun gunakaleiwag.”

²⁵⁻²⁶E, Yeisuw mo ikatiganes, ilana, “Kal isek Yon nakaleiwag mo ibaptayses gamags? Yowbad? o nag? adok gamag mwasanin?”

Bo ibol ninous tasiyas, illivans sisiyas, ilansa, “Kukin bitalivans ‘Yowbad,’ towen gog mo bilivan ‘Aveiyag wawun nukupiyaves aygan?’ Kukin gog bitalivans ‘Gamag mwasanin,’ bo biyagageids gamag babaw, peinan idokes palopit teitan mtowen Yon.”

²⁷Idibakes Yeisuw ilansa, “Nag kakakin.”

Iw to Yeisuw ilivan, “Yey-vak nag balivan, nag bakamtilakeimiy kal isekeig gunakaleiwag.”

Kabebay Kunutaw son Bwadan

28 Yeisuw ikabebay, ilana, “Waninoumiy amawan? Tamwey teitan nitun tawaw asteiy. Mo inek kunutaw ilana, ‘Nagein kun gunabag kuwotet.’

29 “Kunutaw ipiyev. Wankuyeim mo ikanavin nanon; inoun in iwotet.

30 “Tamwey towen mo inek tawanay, ilana, ‘Kun kuwotet.’

“Tawanay ilana, ‘Oo! Bo ban awotet.’ Nag gog, ipiyev wotet, isinal.”

31 Yeisuw ilana, “Asteiy ikatiliganes aygan times, tage kal ikanaway aygan?”

Ilansa, “Kunutaw.”

Iw to Yeisuw ilana, “Mounid adibakeimiy tasiyas mawana kunutaw mo beisiws wanuwan Yowbad nakabkaleiwag. Peinan tasiyas takalbalebs, takaweins takis sisiyas tasiyas ikaninavays mav bo bimugwas Yowbad nakaleiwag waseg; yakamiy mawana tawanay wankuyeim.

32 “Peinan Yon ikatimlakeimiy ked didumwal, tage nag kusimounids. Takalbalebs tasiyas bo isimounids, tawaw vinay. Yakamiy nukukines tage nag ikanavin ninoumiy; nag kusimounids, nag.

Tawteleins bag

(Mak 12:1-12; Luk 20:9-19)

33 “Kabebay kweitan kunages: Tamwey teitan isop gleip babaw, bigulen gleip waseg; kay kaytan isop wadadan bag palavas, bo imlavag anakal; wayn kasinen ivkaes ikous; tamtakavatein bag nabunatum iwlul ikous; ivatam wasigeis gamag mwasanin vagan kid bintakavates inabag; mo inoun in kweitan ven.

34 “Igaw tutan gleip anagin bimwanoug mo ikayabes natouwat mwasanin, binekes tasiyas tamtakavateins bag, idokes tanuwagan bag anagin bikawes.

35 “Nag gog, tasiyas tamtakavateins bag iyagages tamwey natouwat, teitan iwaweis, tayuwein ikatimates, tatounun iwaweis dakul waseg, imat.

36 “Wankuyeim tamwey towen ikayabes natouwat kalamwey babaw, mo iyagages tasiyas.

37 “Ikous, mo ikayeb natun, idoki bivnases natun.

38 “Nag gog, iwtusis natun, ilansa, ‘Mtowen tamwey natun tatonen, kumeis taweis, mo bitakawes bag towen, dakiyays yakids.’

39 “E, iweis, iyousis, itokes tamwey natun, ilaves in watoulan bag, mo iweis imat.”

40 Yeisuw ikatigan ilana, “Igaw beim tanuwagan bag, amawan bikaleiwag wasigeis tasiyas tawteleins bag?”

41 Iweis tasiyas, ilansa, “Biyagagesa singay, bikatimates, siwotet gog mo bisekes gamag mwasanin asisinap bwein, tasiyas mo beitams anagin bisekes tamwey bweilim katanok katanok waseg.”

42 Yeisuw ilana, “Adok nag kuvinis Bukitab livaneig, mamagina:
 ‘Wululay towen tawteleins bunatum nipiyaves,
 Tage bo imlavag anmwamwan bunatum.
 DaGuyaws nawotet towen,
 bo isom nanouds.’”

43 Yeisuw mo ilivan, “Mapun adibakeimiy Yowbad bigidem nakaleiwag wasigeis yakamiy, bisekes ven mwasanin, igaw tasiyas mo beitams inakaleiwag waseg, mo anagin beivag.

44 “Kukin kal bipiyaveig mo kalbaleb bilivet, mamagina bikalivatow wakunuwatan wululay towen mo bigulek won, o kukin gog wululay towen bikalivatow beiweiy gamag teitan mo bikatimimey. Wululay towen yey.”

45-46 Kabebay tasiyas iliganes siyas tanuwgwes lun situwawek sisiyas tasiyas Palisiy, ikakinsa tatineis askabebay. Sivines kid biyousis Yeisuw. Ta-mawan; iwenes gamags, peinan gamag babaw idokes Yeisuw palopit teitan.

Kabebay sagal veivay

(Luk 14:15-24)

22 1-2 Vayuwein Yeisuw ikabebay livanen Yowbad nakaleiwag. Ilana, “Yowbad nakaleiwag mawana guyaw teitan inasagal. Bo isagal peinan natun teitan beivay.

3 “Inasagal avanin ikatineg ikous, ikayabes natouwat mwasanin, idawes gamag bimeis bisagals. Ipiyaves gog.

4 “Wankuyeim ikayabes natouwat mwasanin, idawes tasiyas ilansa, ‘Datoveks bo ikatineg kan ikous, bulumakaw kawkaveks bo iweiyis ikous, bulumakaw bulwaway, askeitub igegayous, bo iweiyis ikous, youd babaw bo ikatinages ikous. Kumeis sagal towen, peinan tamwey natun bo beivay.’

5-6 “Tasiyas gog ipiyaves, issebaws, inounas ineis palatan palatan, teitan in wabag, teitan in bigimwal, mwasanin gog nisesus waven iyousis tamwey natouwats iyagages. Natouwat tasiyas asimwasin nag bikakit vagan; mwasanin ge iweiyis ikatimates.

7 “Guyaw towen iligen, kapasal nuwan, ikayabes takanaviys, ineis iweiyis takalbalebs tasiyas ikous, sibunatum babaw igabus kov waseg.

8-9 “Iyums takanaviys; iwage tamwey ilana, ‘Na-ikadilokes tasiyas beikams sagal to nakatineg. Kuneis guntouwat yakamiy, kudawes tasiyas wadadan ked nisesus, kukin kalisiy bukubanes, kudawes bimeis.’

10 “Inounas palatan palatan, tababaw ibananes mo idawes, mwasanin takalbalebs, mwasanin toubweins. Iliganes, ikatuyouns imeis, bo ikalawt gamag babaw wasagal.

11-12 “Tamwey towen im bikin gamag babaw-wan, iban teitan ta-isikam sagal kweiman, idibek, ilana, ‘Gwa, amawan nukum, ta-ivag amkweim sagal kweiman?’ Topen isesuna ikikapay.

13 “Iw to guyaw, idibakes natouwats ilana, ‘Kuywanis naman kaken taw townen, kulaves bein watoulan, dadub waseg.’ Tasiyas watoulan bivvalams-wan, singaya bigeg ninous.

14 “Yowbad bo idawes gamag babaw; teyuy-e beisiws bimeis.”

Sisal natakis

(Mak 12:13-17; Luk 20:20-26)

15 Siyas Palisiy iliganes, mo ineis, illivans sisiyas, idokes bikatiganes kid mo beibol Yeisuw anilivan.

16-17 Illivans ee... sinap kweitan mo iton. Ikous mo ikayabes sivamul mwasanin sisiyas Elod nagamag mwasanin, idibakes Yeisuw, ilansa, “Tamwey yak, kakakin amsinap moundid, kakakin Yowbad nakaleiwag kukwatimlakay moundid, o nag kugoulus guyawaw mwasanin, peinan gamag babaw wamatam bo katanok-wan. Wananoum amawan? kadilokeids bitatams Sisal natakis? o nag? bitapiyaves adok?”

18-19 Yeisuw gog ikakina asisinap kalbaleb, ilana, “Aveiyag wawun kuyakwaneigs? Tayyaweids yakamiy! Kwatimlakeigs money townen, takis silmanin.” Money katanok mo isekes.

20 Ikow money townen wanaman, ikatimlakes king yagan nises son kululuwan nilen money townen waseg, ikatugan, ilana, “Kavel yagan? kavel kululuwan townen?”

21 Ilansa, “Sisal.”

Iw to Yeisuw, ilana, “Sisal navavag bweina kutams Sisal waseg, o Yowbad navavag bweina kutams Yowbad waseg.”

22 Iliganes, isom ninous, iyums ineis wasiven.

Gamag beikits vayuwein

(Mak 12:18-27; Luk 20:27-40)

23-24 Yam townen tasiyas Sadusiy mo inekes Yeisuw. Tasiyas Sadusiy asilivan ilansa, “Gamag nag beikits kanig waseg.” Mapun ikatiganes Yeisuw ilansa, “Tamwey, Moses nakaleiwag mamagina, kukin kal bikanig, nakwav sam, tage natun nag, kadiloka bwadan beivays son nakwab, igaw mo bikop natun bimplavag tuwan natun.

25 “E, kunutaw teitan wamaven nises, budan teinim tatanok. Kunutaw ivays son nakwav, natun nag, ikanig, isikein ivays son nakwab.

26 “E, isikein ikanig, natun nag, nakwab ivays son tawanay. Tasiyas tawanay imtamats ikous, nitsiyas nag, oko digumasus mo ivays son nakwab; ikanig, natun nag.

27 “Ikous tawaw babaw, wankuyeim mo ikanig kudavin manawen.

28 “Igaw tutan beikits kanig waseg, vin manawen namwan amtowen? Peinan asibabaw neivays siney.”

29-30 Yeisuw gog ikatimop asilivan, ilana, “Ibol ninoumiy, peinan nag kukwakins Bukitab, o peinan nag kukwakins Yowbad natawtoun.

Igaw tut wanakougwaw gamag beikits kanig waseg, mo beikous veivay, peinan gamag bimlavags mamagina Yowbad natakayob nisesus walbalab.

³¹⁻³²“E, moundid gamag beikits kanig waseg. Adok nag bukuvinis Yowbad anilivan wasigeis yakamiy, peinan ilana:

‘Yey Ebelam naYowbad yey;

Yey Aysak naYowbad yey;

Yey Yekob naYowbad yey.’

Yowbad nag ikaleiwag takanigs tatuwes wasigeis; nag. Tage tamwamovs wasigeis ikaleiwag.”

³³Gamag babaw iliganes ansinap, bo isom ninous waseg.

Kaleiwag towen imug

(Mak 12:28-34; Luk 10:25-28)

³⁴⁻³⁶Tasiyas Palisiy iliganes Yeisuw nikatimop asilivan Sadusiy, nikaḡapays, mo ikatuyouns tasiyas Palisiy, imeis. Palisiy teitan ikatigan Yeisuw, mtowen yaḡal sinapun ikakin; ikatugan vaḡan kid biyakwen Yeisuw, ilana, “Dakaleiwags waseg, aw-kaleiwag imug?”

³⁷⁻³⁸Iw to Yeisuw ilana,

“Kadiloka kusiwayoub daGuyaws Yowbad, kululuwam waseg, kaleivim waseg, o nanoum waseg.’

Kaleiwag towen imug; imgwayes kaleiwag babaw wasigeis.

³⁹“Kaleiwag tawtoun kwayuwein nises:

‘Kadiloka kuvnases simwey maḡwana nukuvnaseim tatoneim.’

⁴⁰“Akweiyuna kaleiwag tasiyas wawun kaleiwag babaw, o wawun siyas palopit asilivan babaw.”

Deibid tabun

(Mak 12:35-37; Luk 20:41-44)

⁴¹⁻⁴²Tasiyas Palisiy ikatuyouns nimeis, Yeisuw mo ikatiganes, ilana, “Waninoumiy Mesay amaḡawan? kavel tabun?”

Iweis tasiyas, ilansa, “Deibid tabun.”

⁴³⁻⁴⁵Yeisuw mo ikatiganes, ilana, “E, Mesay Deibid tabun; tage kweiboug Yowbad Kululuwan isek Deibid ansinap mo ilivan, idok Mesay inaguyaw tatonen; anilivan mamagina:

‘DaGuyaws idibek gunGuyaw, ilana:

Kusin wagunkatay, vaḡan bavages beibus siyas astameiliw yak, bukuvnivans wakunutes.’

Peinan Mesay Deibid tabun, amaḡawan Deibid idok tabun naGuyaw tatonen?”

⁴⁶Bo ikapays tasiyas. Ta-kal bikatimop aygan. Bo iyakous sikatugan waseg Yeisuw. Wankuyeim mo igoulus; nag teitan ikatugan waseg, nag.

Yeisuw ikānes tasiyas takatimlakeins kaleiwag sisiyas Palisiy
(*Mak 12:38-40; Luk 11:37-52; 20:45-47*)

23 ¹⁻³Yeisuw mo idibakes gamag babaw, sisiyas navamul, ilana, “Moses kweiboug ikaleiwag gamag wasigeis, o nagein tut townen siyas takatimlakeins kaleiwag, sisiyas Palisiy, bo ikaliwageids māwan. Mapun kadiloka kukwanawes ages; tage asisinap awoum kukwawes, peinan nag ivnāses kaleiwag tasiyas nisekeids.

⁴“Sikaleiwag tasiyas mamagina kunamiy singay mōumouvit nissekeimiy, tage nag kweitan koun kakit bikawes tatineis.

⁵“Siwotet iwteles vāgan gamag babaw bikines mo bikavasis. Bukitab yageivein mwasanin iyawanis ikaygwagwes wawous vāgan gamag bikines, o kweiman tapwāloul issikams vāgan gamag babaw bikines.

⁶“Sivines kid bimgwayes gamag babaw, sagal waseg; o sivines abes wanakaew wanuwan sinagog.

⁷“Kukin binounas bineis waven sivines kid gamag babaw bikululs wamtes, o bigoulus, billivans, ‘Guntakatimlakay yak.’

⁸“Awoum gamag bidokeimiy ‘Guntakatimlakay yak,’ awoum; peinan mitakatimlakay anmwānet, o yakamiy katanoka gamag yakamiy. Deisa kulansa, ‘Gwa.’

⁹“Ven watinow yakids awoum kudokes teitan, kulansa, ‘Timem,’ peinan Tamads anmwānet nises walbālab.

¹⁰“Awoum gamag bidokeimiy ‘Guntovek yak,’ peinan mitovek Kelis. Nag tayuwein mitovek nises, nag.

¹¹“Kukin kal bimlavag mitouwat mtowen mo bimgwayeimiy.

¹²“Kukin kal sivinan bimliguyaw mo beibus; tage kukin kal binib tatonen igaw mo biguyaw.

¹³“Tayyaweids yakamiy takatimlakeins kaleiwag yakamiy, o yakamiy Palisiy, singay kalbaleb bukulivatus, peinan kusilbwades Yowbad nakabkaleiwag kidenen; yakamiy nag bukusiws; mogo gamag mwasanin beisiws kid; nag gog, bo kusilbwades. ¹⁴(-)

¹⁵“Tayyaweids yakamiy takatimlakeins kaleiwag yakamiy, o yakamiy Palisiy, singay kalbaleb bukulivatus. Kutāvins vena babaw, ikous mo kukuks, bwānit kadiveiyov kudopels. Aveiyag wawun? gamag anmwānet mo bikow mitapwāloul bimlavag gum-Yudiy. Ikous, mo gamag townen kuvāges imlavag Seitan angamag, māwana yakamiy, tage bo bilisaweimiy ansinap kalbaleb waseg.

¹⁶“Takatimlakeins gamag yakamiy, bo ibol ninoumiy, singay kalbaleb bukulivatus. Kulivans, ‘Bweina bitatabudabod Yowbad nabunatum waseg, adilivan yaweid, tage bitatabudabod waseg goul townen nises Yowbad wanbunatum, awoum bitayaweid.’

17“Bo ibol ninoumiy, amisinap nag. Aveiyag imug? Goul townen imug? O Yowbad nabunatum imug? Mounid Yowbad nabunatum imug, peinan goul nises wanuwan.

18“Kulivans-vak, ‘Bweina bitatabudabod abeilun waseg, adilivan yaweid, tage bitatabudabod waseg lun to nises wakunuwatan, awoun bitayaweid.’

19“Bo ibol ninoumiy, amisinap nag. Aveiyag imug? lun townen? o dakabeiluns Yowbad wanbunatum, inalun nises wakunuwatan?

20“Mapun, igaw bukutabudabod abeilun waseg, bo kutabudabod wasigeis youd babaw nisesus wakunuwatan.

21“E bukutabudabod waseg Yowbad nabunatum, bo kutabudabod waseg bunatum son mtowen nises wanuwan.

22“E, bukutabudabod libalab waseg, bo kutabudabod waseg Yowbad aban son mtowen-vak nissin waseg. Bo ibol ninoumiy yakamiy.

23“Tayyaweids yakamiy takatimlakeins kaleiwag yakamiy, o yakamiy Palisiy, singay kalbaleb bukulivatus. Gayas siyas kekel minit, dil, kamin, kulagus sinawatan, kalgutan kutams Yowbad waseg, tage Yowbad nakaleiwag avakaein waseg nag kutams, peinan sinap didumwal kupiyaves, siwayoub kupiyaves, simounid kupiyaves Yowbad waseg. Kadiloka kunuwes sinap siyas avakaein. Nag gog. Awoum kupiyaves sinap siyas babaw-wan.

24“Takatimlakeins gamag yakamiy, mitamiy nag. Kwatkakils sinap kakit wasigeis, mamagina pwasigisig wanuwan amivavan mo kupiyaves, tage kamel sona kwanpwanis.

25“Tayyaweids yakamiy takatimlakeins kaleiwag yakamiy, o yakamiy Palisiy, singay kalbaleb bukulivatus. Kwawig o abmavin watoulan kwatkakils, kuwidis bwein, gimagim watoulan, tage wanuwan kaeimiy bukuveinaws gamag wasigeis.

26“Matam nag, Palisiy yak. Bweina beivag amsinap bwein, waseg bukuban kam, mo bukusen wamkwabmavin o amkwawig waseg; babaw mo beibwein watoulan o wanuwan.

27-28“Tayyaweids yakamiy takatimlakeins kaleiwag yakamiy, o yakamiy Palisiy, singay kalbaleb bukulivatus. Mamagina alawag yakamiy, dakul watoulan singay ankakin bwein, singaya pwapwakaw, wanuwan gog kalbaleb, gamag tatuwes sei, youd bikibik sei. Yakamiy bo mawan, amikakin watoulan gamag ikines, magina sinap didumwal, waninoumiy gog sinap yaweid, ikamimet, kalbaleb seikwan.

29-30“Tayyaweids yakamiy takatimlakeins kaleiwag yakamiy, o yakamiy Palisiy, singay kalbaleb bukulivatus. Tasiyas palopit asisinap didumwal, kweiboug imats, sikalawag nukutoumis, astubub kusenans, mo kulansa, ‘Magat yakids bitasesus sidayas, tammwayas isitut waseg, nag bitalabes igaw iwaweis siyas palopit.’

31-32 “Yakamiy gog kulivans māwan, peinan tammwayas tibsiyas yakamiy, amisinap māwana tasiyas, mo bukuyakousis siwotet kalbaleb.

33 “Mwatet nitun yakamiy, Yowbad bikaleiwag bilaveimiy bukuneis wadiginasim. Ta-māwan bukusawls bukuneis.

34 “Mapun akayabes palopit babaw, tassinaps babaw, takatimlakeins kaleiwag babaw; tasiyas biwekeimiy, igaw bukwatimates mwasanin, mwasanin bukuweiy waklos, mwasanin wamibuntuman tapwəloul bukuwaweiy vatul waseg, bukwatigigayes mwasanin mo bisawls bineis ven kweitan kweitan.

35 “Amisinap mapun mo bukulivatus son mapun asisinap tasiyas kweiboug neiweiy palopits. Ven watinow gimgilis yakamiy nukuweiy tasiyas tadidumwals, nukusilamaws waseg tadidumwal townen Eibel; mo nukuwaweiy tasiyas palopits oko Balakiy natun Sekaliy nukuweiy Yowbad wanbunatum, abeilun palatan, Yowbad nabunatum palakakit palatan.

36 “Mounid adibakeimiy gudwouvaws yakamiy, bo bukulivatus mapun amisinap kalbaleb sona asisinap tasiyas tabgəboug.”

Yeisuw ivəlam peinan Yelusalem

(Luk 13:34-35)

37 Livānen ven townen Yelusalem Yeisuw mo ilivan mamagina “O Yelusalem gimgilis yakamiy, nukuwaweiy tasiyas palopits, o dakul waseg nukuwaweiy tasiyas Yowbad nikayabes niwekeimiy; tut babaw sivinag bamtakavateimiy māwana kolkolek imtakavates nitun; nag gog, kupiyaveigs.

38-39 “Mapuna Yowbad ipiyev miven. Makava bukusesus. Igaw nag bukukineigs ee... anatut bukulivans, ‘DaGuyaws nikayabeim nukum, mapuna kakavasim,’ mounid mo bukukineigs.”

Igaw bigulekwes Yowbad nabunatum

(Mak 13:1-2; Luk 21:5-6)

24 ¹Yeisuw ilisow Yowbad nabunatum, inoun; navamul mo inekes, ikamtilakes Yeisuw bikin Yowbad nabunatum siyas bunamnabweins.

²Yeisuw ikatimop ages, ilana, “Kukines bunsiyas bunatum. Mounid adibakeimiy bo bigulekwes biyakousis; dakul babaw bilaves bikatigayes.”

Mouvit tutan nakabsilamaw ven watinow

(Mak 13:3-13; Luk 21:7-19)

³Inounas ineis koy townen bigulen oliv nises, isin; tasiyas navamul inekes, ilansa, “Kudibakem asinavin bigulekwes bunatum bunawen

bunavakaein; amawan bakakakin avei-tut bukuyum bukum mo beikous ven watinow?”

⁴Iw to Yeisuw, ilana, “Awoum gamag mwasinis bikatidavimiy.

⁵“Igw teitan bisap, bilana, ‘Yey Mesay Kelis yey,’ wankuyeim tayuwein bisap bilana, ‘Yey Mesay Kelis yey,’ wankuyeim tatounun mawan; e, mawana mawana ee... singay babaw. Tasiyas bo bikatidividavs wasigeis gamag babaw.

⁶“Livānen naviy bukuliganes, livan kweitan kweitan, awoum beiyow nuwamiy, kadiloka bivages mawan; nakabiyokous tut igaw.

⁷“Peinan ven kweitan bikanaviys kweitan ven waseg, ven avakaein bikanaviys ven avakaein waseg; ven mwasanin bikamates moun; ven mwasanin nik avakaein bivag.

⁸“Youd tasiyas moumouvit bisunaps, igaw mo bivakaein.

⁹“Tasiyas ikamliweimiy mo biyagageimiy, bikatimateimiy; e, vena babaw gimgilis bikamliweimiy peinan gungamag yakamiy.

¹⁰“Mapuna mwasinis bikalouws; mwasinis bisilkodes sisiyas, bikamliwes.

¹¹“Palopit siyas mwasanin tayyaweids bisaps, bikatidavis gamag babaw.

¹²“O sinap kalbaleb bo bivakaein, mapuna mo beigwey siwayoub wasigeis gamag babaw.

¹³“Kukin kalisiy bikaptules, ee... nakabiyokous tut waseg Yowbad mo bikatinabwes.

¹⁴“Gungamag igaw mo bikawes livānen Yowbad nakaleiwag, biguyes vena babaw wadaban pwepway, bikatiliganes, mo beikous ven watinow.

Moumouvit anatum

(Mak 13:14-23; Luk 21:20-24)

¹⁵⁻¹⁶“Kweiboug palopit Daniyel nilivnek teitan nawotet igaw biyableb Yowbad navavag, youd singay kalbaleb waseg. E, igaw yakamiy bukukines towen Yowbad wanbunatum. (Bukuvinis livan towen kadiloka bukukwkins). E, igaw bukukines sinap towen, bukusesus Yudiy, kadiloka kusawls kuneis wakoy.

¹⁷“Magat bukuyeiwas wampwasiw, awoum kusiw vayuwein wambunatum wanuwan vāgan bukukow muwliyow, awoum. Nuwanaw kusawls.

¹⁸“Magat bukuwotet wābag, awoum bukuyum bukukow amkweim.

¹⁹“Tut towen wanakougwaw singay moumouvit bilivatus siyas vinay kakudapoms, o siyas vinvanuns.

²⁰“Kadiloka kunitougs waseg Yowbad vāgan awoum bukusawls bulbweilim waseg, o awoum bukusawls Tapwāloul waseg.

²¹“Peinan tut singay moumouvit. Nag kweitan tut ivag movitan mawana towen, kweiboug nag, igaw tut wanakoug nag.

22 “Kukin Yowbad nag bigidem moumouvit townen, nag kal son mwamovan bises. Tage Yowbad bo bigidem moumouvit, pinamiy inagamag yakamiy.

23 “Kukin kal bilivan, ‘Mesay townen-an,’ o bilivan, ‘Mesay townen-one,’ awoum kusimounids waseg.

24 “Peinan tayyaweids mwasanin bisaps, gamag bidokes Mesay tasiyas; o tayyaweids mwasanin bisaps, gamag mwasanin bidokes palopit tasiyas, bikatimlakays aniyes, mamagina naman mulin Yowbad, vāgan kid bikatidavis gamag; idokes kid bikatidavis Yowbad nagamag.

25 “Bo akatiboug nuwamiy sinap townen.

26 “Kukin gog gamag mwasinis bidibakeimiy, bilansa, ‘Mesay wanawoud nises,’ awoum bukun kukin; awoum. Kukin bilansa, ‘Nises bunatum wanuwan,’ awoum kusimounids.

27 “Iḡaw Gimgilitoun yey bāyum baw, mamagina mititeilin kavikawn bisap wanuvid bimteil ee... bein wayavat, gamag babaw bikines.

28 “Avanuy takanig nises, mansiyas bunibwan bikatuyouns bimeis.

Gimgilitoun beiyum beim
(Mak 13:24-27; Luk 21:25-28)

29 “Moumouvit anatut beikous, kaḡas mo bidadub, tibukon-vak bikanig mititeilin, siyas wutun walbaḡab bikalkaḡlouws, youd siyas wanakaew bo beigwey.

30 “Mo bukukines aniyag wanakaew yey Gimgilitoun. Ven babaw gimgilis bivaḡams, bikineigs Gimgilitoun yey, bo baw lov waseg, soug guntawtoun o yakawanag avakaein waseg.

31 “Bwagig biyik avakaein vāgan guntakayobs bineis bikatiyounis gungamag wanuvid, wayals, wayavat, wabomat, bilisawes vena babaw wadaban pwepway, mo bimekeigs yey.

Yaveinun livānen
(Mak 13:28-31; Luk 21:29-33)

32 “Kabebay nises yaveinun waseg. Kadiloka kuliganes sinapun yaveinun. Bukukin biyaḡas yageivein kweivaw mo bukukwakins wuwal bisilamaw.

33 “Māwan magin bukukines youd tasiyas mo bukukwakins Gimgilitoun yey basap, mamagina wakoukwed nases.

34 “Mounid adibakeimiy gamag yakamiy, igaw son mwamovamiy bukusesus, mo bukukines youd siyas babaw.

35 “Libaḡab son ven watinow bigulek beikous, tage agulivan nag beikous, nag.

Ta-kal ikakin avei-yam
(Mak 13:32-37; Luk 17:26-30, 34-36)

36 “Ta-kal ikakin avei-yam o avei-tut, nag; min-libaḡab na-ikakins; yey nag bakakin; misinaka Tamag ikakin.

37“Mawana tutan Now, mawana tutag yey, Gimgilitoun yey.

38“Peinan kweiboug anatum yevagam na-ipop ven, gamag ikamkwams, imwamoums, iveivays, Now mo itouw wawag.

39“Yam towen na-ikakins ee... kweis mo isap iyagages tasiyas. Mawan magin Gimgilitoun yey bayum bam, gamag nag bikakins avei-tut.

40“Tawaw asteiy biwwotets wabag, teitan bakow, teitan bises.

41“Vinay asteiy bikanimimayes wit, natan bakow, natan bises.

42“Kadiloka kumtakavateimiy, peinan nag kukwakins avei-tut miGuyaw yey mo bam.

43“Kadiloka kukwakins sinap towen. Magat tanuwagan bunatum bikakin asinavin boug waseg tavveinaw bisap, bo beikit bintakavet nabunatum, mata ge tavveinaw ge im iven navavag.

44“Mawan-vak yakamiy, kadiloka kwatunags, peinan Gimgilitoun yey bayum, o yakamiy nag kukwakins tutag bayum bam.

Teitan itoukum, teitan igwey

(Luk 12:41-48)

45“Tamwey inagamag isek inawotet vagan tut babaw bivakamus tasiyas wanbunatum nisesus. Yam katanok katanok inawotet towen. Kavel bitoukum nawotet towen waseg? Adok towen ansinap bwein.

46“Igaw natovek beiyum beim, biban nagamag inawotet bwein, bikalin nuwan waseg mtowen; o nagamag towen mo bimwasaw.

47“Mounid mo bisek nagamag towen nawotet mamagina tanuwagan navavag babaw-wan.

48-51“Kukin gog nagamag ansinap kalbaleb, bilivan, ‘Guntovek bo iyouviy,’ mo bikawegweis won, biwaweiys siney, o beikams bimwamoums siney siyas tamwamoums mo bikabalaweins, natovek gog igaw mo beim, tutan nag bikakin, bisap, bisibilut, mo bimop ansinap kalbaleb; bilev gamag towen binekes tasiyas tayyaweids, mo bivvalams, singay bigeg ninous.

Kabebay guwavin sinawatan

25 1“Tage Yowbad nakaleiwag mamagina guwavin sinawatan, silamp ikawes, inounas binekes kid mtowen taveivay.

2“Nanim nag isinaps bwein; nanim nasinaps.

3-4“Tasiyas nag isinaps, ikokews silamp, tagon go nag. Tage sisiyas sam sitagon wabotol.

5“Igaw ikayamats, toge taveivay iyouviy; mites inanup tasiyas, mo imasis.

6“Watapwan boug, teitan iwak, ilana, ‘Taveivay bo neim; kumeis tanekes.’

7“Ikits tasiyas, bivakanotes silamp.

8 “Tasiyas nag isinaps idibakes sisiyas, ilansa, ‘Tabta mitagon bukusekemas, ne? Malamp bo imt̄amats.’

9 “Iweis sisiyas, ilansa, ‘Adok nag ampw̄avin yakamiy mouy yakamey. Kuneis wastow kugimwals.’

10 “Inounas tasiyas bigimwals, mo isap towen taveivay; tasiyas bo ikatunags ikous mo isiws sisiy towen taveivay, inasagal silm̄anin; koukwed mo ikatibagus.

11 “Wankuyeim sisiyas mo iyum imeis, itamanaws watoulan bwan, ilansa, ‘Maguyaw yak, kwaliyow koukwed pinem yakamey.’

12 “Iw mtowen, ilana, ‘Nag akakin yakamiy.’ ”

13 Yeisuw ilana, “Kadiloka kutoukums, kumtakavateimiy, peinan nag kukwakins avei-tut o avei-yam mo bam.

Kabebay money avakaein

(Luk 19:11-27)

14 “Peinan m̄awana tamwey teitan binoun bilakwen kweitan ven, idawes natouwat asteitoun, imeis, isekes simoney v̄agan biwotets waseg.

15 “Teitan gamag tawtoun, isek kweinim tawsan kina. Tayuwein natawtoun kalamwey avakaein, isek akweiy tawsan kina. Tatounun nag bivakaein natawtoun, isek katanok tawsan kina. Isek es ikous, mo inoun in kweitan ven.

16 “Natovek bo inoun, towen gog tatawtoun ikow inamoney kweinim tawsan kina, igaw bikuney mo bikatimweis inamoney. E, inamoney ikatimweis kweinim tawsan kina, imlavag sinawatan tawsan kina.

17 “M̄awan-vak tayuwein ikatimweis kweiy tawsan kina, imlavag kweivas tawsan kina.

18 “Tatounun gog, ikow inamoney katanok tawsan kina, ikaviyeil pwepway, idibwen natovek inamoney.

19 “Tut kadiveiyov ikous, iyum sitovek im, idibakes tasiyas bimeis v̄agan bimeyes namoney bikin.

20 “M̄townen nisek kweinim tawsan kina, ikow imey namoney, sinawatan tawsan, ilana, ‘Tamwey, kweinim tawsan nukusekeig towen, son kweinim tawsan aban, bo akatimweis.’

21 “Iw natovek, ilana, ‘Bwein! Guntouwat bwanabwein yakoum. Peinan bo kutoukum wotet kakit, mapuna basekeim avakaein. Kusiw kum, gunakabmw̄asaw waseg.’

22 “Tayuwein nisek kweiy tawsan kina, ikow imey namoney, ilana, ‘Tamwey, kweiy tawsan nukusekeig towen, son kweiy tawsan aban, bo akatimweis.’

23 “Iw natovek, ilana, ‘Bwein! Guntouwat bwanabwein yakoum. Peinan bo kutoukum wotet kakit, mapuna basekeim avakaein. Kusiw kum, gunakabmw̄asaw waseg.’

24-25 “Tatounun nisek katanok tawsan kina, ikow imey namoney, ilana, ‘Tamwey, akakin amsinap keikay, anagin gamag siwotet kukokew ven babaw; mapun aweneim, akaviyeil pwepway, adibwen mumoney, bo avnas bwein; nises towena.’

26-27 “Iw natovek, idibek, ilana, ‘Singay tougwey, guntouwat kalbaleb yakoum. Kukwakin-wan agusinap keikay, anagin gamag siwotet akokew ven babaw; kadilok-wan bukusen gunmoney wanuwān benk, bikatimweis bibabaw; ga bayum bam mo bakow siyas gunmoney babaw.’

28-29 “Natovek mo idibek natouwat teitan, ilana, ‘Kukow inamoney katanok tawsan kina, kusek mtowen tatawtoun, bikatimweis inamoney, bmlavag singay babaw, sinawatan katanok tawsan kina.’ Kukin kal navavag sam, igaw mo bikow bikatimweis, bibabaw. Kukin gog kal tavavag navavag, teitan mo bikow aveiyag nises; mounida beidev mtowen.

30 “Sitovek mo ilana, ‘Kadiloka kukow guntouwat towen kalbaleb, kulev bein watoulān, dadub waseg. Tasiyas watoulān bivvālamswan, singay bigey ninous.’

Bikaleiwag vena babaw wasigeis

31 “Igwāw bam, Gimgilitoun yey, soug yakawanag, o sigwey min-libālab asibabaw, mo basin ābag bwanabwein waseg.

32-33 “Vena babaw gimgilis bikatuyouns bimeis wamatag, bakatukin. Mamagina tamtakavatein alen bikatukin, alen sip bineis palatan, alen gout bineis palatan. Mansiyas sip bineis wanakatay; tage mansiyas gout bineis wankimaw.

34-36 “Miguyaw yey bakatukin, gamag mwasanin wagunkimaw, mwasanin wagunkatay. Ikous mo badibakes tasiyas wagunkatay nisesus, balana, ‘Kumeis yakamiy, Tamag nisiwayoub wasigeis yakamiy, kweiboug nibun ven watinow mo ikatineg mikabmwāsaw pinamiy yakamiy; e, kumeis kumwāsaws. Peinan agumoun, kag nukusekeigs; agudak, soup nukusekeigs; agutowous nag mo nukulabeigs; nases sona mwadoyag, nukusekeigs agukweim; agukwatoun nukuvnaseigs; wadeil nases, nukulakwaneigs.’

37-39 “Tadidumwals tasiyas mo bikatimapus aygag, bilansa, ‘Tamwey, asinavin kakineim soum amumoun kasekeim kam, o amdak kasekeim soup, o amtowous nag mo kalabeim, o sona mwadoyam kasekeim amkweim, o amkwatoun mo kavnaseim, o wadeil nukuses mo kalakwaneim?’

40 “Miguyaw yey mo bakatimop ages, balana, ‘Mounid adibakeimiy, kweiboug nukuleb teitan bwadag takakit, māwana yey bo kulabeig.’

41 “Mo badibakes tasiyas wagunkimaw isesus, balana, ‘Kulisaweigs takalbalebs yakamiy, amisinap bo ikunakeimiy, kuneis kov towen nag beikous, Yowbad nikatineg silmanin Seitan siney siyas baloum.

42-43“ ‘Peinan agumoun, ta-kweitan kag kusekeigs; agudak, ta-kweitan soup kusekeigs; agtowous nag, ta-kulabeigs; sona mwadoyag, ta-kweitan kweim kusekeigs; akatoun, ta-kuvnaseigs; ases wadeil, ta-kulakwaneigs. Takalbaleb yakamiy!’

44“Tasiyas bikatimapus aygag, bilansa, ‘Tamwey, asinavin kakineim amumoun, kakayus gog kan; o amdak, kakayus soup; o amtowous nag, o sona mwadoyam, o amkwatoun, o wadeil kuses, tage nag kalabeim?’

45“Mo bakatimop asilivan, balana, ‘Mounid adibakeimiy, kweiboug nag kulabes teitan bwadag takakit, mawan yey nag kulabeigs.’

46“Tasiyas asininap kalbaleb bisiwatoulan, asininap kalbaleb mapun bilivatus tut nag beikous; tasiyas gog tadidumwals beisiws abmwamov waseg bisigagas.”

Tammwayas sivines beiweiys Yeisuw
(Mak 14:1-2; Luk 22:1-2; Yon 11:45-53)

26 ¹⁻²Iyakousis anilivan tasiyas, Yeisuw mo idibakes navamul, ilana, “Adok kukwakinsa akweiy yam mo Kaltuwon Sigeilin; teitan mo bisilkodeig, Gimgilitoun yey. Gamag mwasanin mo biyousigs bikatimateigs waklos.”

³Misiyamun towen tasiyas tanuwgwes lun situwawek sisiyas tammwayas katuyouns ineis tanuwgwes lun sitovek avakaein wanven, mtowen yagan Kayapas.

⁴Sivines kid biyousis Yeisuw bikatimates; illivans silmanin.

⁵Ilansa, “Kadiloka tasinaps beibwein; amawan bitayousis. Awoum bitayousis sagal waseg; peinan gamag singay babaw; adok mwasanin bikayuses, igaw mo bikawpwanaws.”

Natan vin iptum Yeisuw kunun
(Mak 14:3-9; Yon 12:1-8)

⁶Yeisuw nises Betaniy, Saymon wanbunatum, mtowen toulepel.

⁷Natan vin inek Yeisuw, nabotol bwanabwein wanaman, tagon nises, tage maysan singay avakaein. Yeisuw igaw ikamkwam, isap manawen, tagon towen iligubok kunun Yeisuw.

⁸⁻⁹Navamul ikines, ikavikuns, ilansa, “Bo iyamkwen tagon bwanabwein. Kadiloka biyamiyis, maysan avakaein bikow, money towen bivgen tasiyas tasimavs wasigeis.”

¹⁰⁻¹³Yeisuw gog bo itilikwen asilivan, ikatimop, ilana, “Awoum kulivans, ivag geg anmwasin. Inawotet bwanabwein waseg yey. Tut babaw tasiyas tasimavs simiyas nukusesus; yey gog kweitan, igaw mo balisaweimiy. Bo iptum woug silmanin anatum bidibwanigs. Mounid adibakeimiy, ampalawen ven watinow igaw bikawes livaneig, o livanen-vak manawen vin bikawes binawes, gamag babaw biliganes, mo bininuways inawotet towen.”

Yudas itam kid bisilkod Yeisuw

(Mak 14:10-11; Luk 22:3-6)

14-15 Yeisuw navamul sinawatan teiy, teitan gog yagan Yudas Iskaliyot inekes tasiyas tanuwgwes lun situw_{avek}, ilana, “Kweivin maysan bukusekeigs mo bakantel Yeisuw avanuy misikey-yay, mo bukuyousis?” Isenas money silib sinawatoun, mo itam.

16 Wankuyeim Yudas inineiv amata-ked bwein waseg mo bisilkod Yeisuw.

Kaltuwon Sigeilin

(Mak 14:12-21; Luk 22:7-14, 21-23; Yon 13:21-30)

17 Yam townen isilamaws anawik bikatunags silmanin Kaltuwon Sigeilin. Navamul Yeisuw inekes, ilansa, “Avanuy bakakatineg sagal townen v_{agan} bukukwam?” Wik townen nag beikams bled son yist; bwaboum.

18 Iw to Yeisuw, ilana, “Kunekes mtowen nises waven, kudibakes, kulansa, ‘Matovek ilivan, ilana: Tutag bo alivet, wambunatum bakakam Kaltuwon Sigeilin, sigwey gunavamul.’ ”

19 Tasiyas iliganes, ikanawes aygan, inounas, ineis, ikatinages sagal townen.

20 Kwayav mo isinis siney navamul tasiyas sinawatan teiy, beikams.

21 Igaw ikamkwams, ilivan, “Mounid adibakeimiy, teitan nises wasigeis yakamiy, igaw mo bisilkodeig.”

22 Singay igeg ninous, katanok katanok mo idibakes, ilansa, “Tamwey, kal bisilkodeim? Yey? o nag? kavel?”

23 Ikatimop, ilana, “Mtownen soug kakokew kan wakabmavin, igaw mo bisilkodeig.

24 “Gimgilitoun yey banoy ban makadewen ked nilivnakes Bukitab waseg, tage taw townen tasilkodeig singay kalbaleb bilivet. Magat inan nag bikop taw townen bo bwein, tage bo ikop, mo singaya kalbaleb bilivet.”

25 Tasilkodein Yeisuw yagan Yudas mo ikatigan, ilana, “Guntovek yak, mtowen kavel? Yey?”

Iw to Yeisuw, ilana, “M_{awan}.”

Datoveks inakamkwam

(Mak 14:22-26; Luk 22:15-20; 1 Kolinit 11:23-25)

26 Igaw ikamkwams, Yeisuw ikow bled, anilivan bwanabwein isek, mo ivgen, isekes inavamul wasigeis, ilana, “Kaeimiy townen woug, kukwams.”

27-28 Ikous, mo ikow kw_{avig}, ikalin nuwan Yowbad waseg, ikiv, isekes, ilana, “Tababaws yakamiy kumoums townen buy_{avig} silmanin kaleiwag kweivaw; buy_{avig} iwt_{awout} biwid kid amisinap kalbaleb, simiyas gamag babaw.

²⁹“Adibakeimiy, nag vayuwein bamoum gleip sipinen ee... anatum kweivaw sipinen mo bitamoums Tamag wanakabkaleiwag.”

³⁰Asiwous ikanweles ikous, mo isaps ineis koy towen bigulen oliv nises.

Yeisuw ilivnek Pita bikayan

(Mak 14:27-31; Luk 22:31-34; Yon 13:36-38)

³¹Ineis koy towen, Yeisuw idibakes, ilana, “Boug towen bukupiyeveigs amibabaw-wan yakamiy, livanen nises Bukitab waseg, mamagina:

‘Baweiy tamtakavatein mansiyas sip, mo bikatigayes alen.’

³²“Igwaw bakit vayuwein mo bamug ban Galiliy waseg; yakamiy wankuyeim, mo kuwekeigs Galiliy waseg.”

³³Iw to Pita, ilana, “Magat babaw bipiyaveims, yey gog nag bapiyaveim.”

³⁴Yeisuw ilivan, “Adibakeim yak, boug towen waseg bukwayaneig sivatoun, mo beigel kolkolek.”

³⁵Iw to Pita, ilana, “Kukin bikatimateims, soug yak bikatimateids aditeiy. Nag bakayaneim, nag.” Inavamul babaw asilivan bo mawan.

Getsemaniy waseg initoug

(Mak 14:32-42; Luk 22:39-46)

³⁶Siney navamul mo ineis ven yagan Getsemaniy, idibakes, ilana, “Kusinis towen. Yey ban palatan anitoug Yowbad waseg.”

³⁷Mo idawes tasiyas Pita siney Sebediy nitun asteiy, mo ivag asteivas, ineis isiwas; mo igeg nanon, won imouvit seikwan.

³⁸Idibakes, “Woug moumouvit mawana dakul, kakita bakanig adok. Bweina kusesus towen kulalals, kulabeigs nitoug waseg.”

³⁹Inoun, nag in kadiveiyov, imasis kantukov, initoug, ilana, “Tamag, magat bukutam bo bapiyev kwavig towen, singay yayan; tage amawan yakoum nanoum, nanoug yey awoum.”

⁴⁰⁻⁴¹Ikous, iyum inekes asteitoun, bo imasis. Idibek Pita, “Ta-bukulalals bukulabeigs tut kadiyakus waseg. Kutoukums, kulalals, kunnitougs; mata ge bukusiws abiyokon waseg. Bo iseiw nuwamiy wotet towen, tage tougwey yakamiy.”

⁴²Sivyuwein in initoug, ilana, “Tamag, adok nag kadilok bukwayus kwavig towen, bweina bamoum. Aveiyag wananoum bo bavag mawan.”

⁴³Iyum inekes bo imasis, peinan bo inanup mites.

⁴⁴Sivtounun ilisawes, initoug; anilivan mawana nilivan mo initoug.

⁴⁵⁻⁴⁶Ikous, iyum inekes navamul, idibakes, ilana, “Igwaw kuyeiwas, kummasis. Bo deis! Datuts bo ikous. Bo isap tasilkodeig Gimgilitoun yey. Takalbalebs bo nimeis kid biyousigs yey. Kukits tanounas, tasilkodeig bo isap!”

Iyousis Yeisuw

(Mak 14:43-50; Luk 22:47-53; Yon 18:3-12)

⁴⁷Yeisuw igaw ilivan, isap inavamul teitan yagan Yudas, siney babaw gamag ikokews sipulut sei, sinew sei. Tanuwgwes lun situwāvek sisiyas tammwayas nikayabes nimeis.

⁴⁸Towen tasilakod bo nidibakes, “Kukin kal bakamuloul soug, towen kuyousis, mtowen Yeisuw.”

⁴⁹Nuwanaw mo inek Yeisuw, ilivan, “Kalin nuwag guntovek yak,” mo imulouls son.

⁵⁰Iw to Yeisuw, ilana, “Gwa, wawun nukum?”

Ituts tasiyas, iwekes, iyousis Yeisuw, itawtouns waseg.

⁵¹Son Yeisuw teitan igut napulut wakaban nises, iweiy natouwat tanuwgwes lun sitovek, ibob teigan.

⁵²⁻⁵⁴Iw to Yeisuw, ilana, “Kuyamen mupulut, bein wakaban. Tasiyas gog tawayins gamag pulut waseg, igaw bikankanigs pulut waseg. Adok nag kukwakins gunanitoug waseg Tamag, nuwanaw mo beitam min-libalab bilabeigs, singay babaw tawsans. Nag gog. Kukin nag biyousigs, ta-māwan bikamat livaneig Bukitab nilivnek.”

⁵⁵⁻⁵⁶Misiyamun towen Yeisuw idibakes asibabaw, ilana, “Yam babaw nases Yowbad wanbunatum akatimlakes gamag, ta-kuyousigs. Nagein gog aveiyag wawun kukokews mipulut, minew, nukumeis kuyousigs mamagina tavveinaw yey? Tage youd towen ikamat peinan tasiyas palopit nilivnakes Bukitab waseg.” Navamul aspwayat ilisawes Yeisuw; mo isawls.

Yeisuw iyatal waseg Kayapas

(Mak 14:53-65; Luk 22:54-55, 63-71; Yon 18:12-14, 19-24)

⁵⁷Iyousis Yeisuw ikous, inawes Kayapas wanbunatum; mtowen tanuwgwes lun sitovek avakaen. Inaven waseg nikatuyouns nimeis tammwayas sisiyas takatimlakeins kaleiwag.

⁵⁸Mtowen gog Pita ikikikun wankuyeim ee... isap waven, isin waven siney tamwey towen natouwats, idoki aveiyag binuwakes.

⁵⁹Tasiyas tanuwgwes lun situwāvek sisiyas takaleiwags babaw inineivs kalisiy biyaweids yatal waseg vāgan kid mo bikatimates Yeisuw.

⁶⁰⁻⁶¹Babaw iyaweids, Yeisuw silmanin, tage nag ibanēs silawun yatal, nag.

Wankuyeim asteiy mo imeis, ilansa, “Taw towen ilivan, ‘Kadilokeig bagulek Yowbad nabunatum, yam kweitoun mo bawlulavaw bayakous.’ ”

⁶²Itamanaw tanuwgwes lun sitovek, ikatigan Yeisuw, ilana, “Aveiyag bukwatimop? Aveiyag amsinap towen, tasiyas nillivans?”

⁶³Yeisuw gog isesuna ikikapay.

Iwage tanuwgwes lun sitovek, ilana, “Tamwamov Yowbad iligen amlivan yak; kadiloka kulivan moundid. Tab yəkoum Yowbad Natun, Mesay? o nag?”

⁶⁴Yeisuw idibek, ilana, “Məwan amlivan. Vayuwein livan mo badibakeim:

‘Igwə bukukineigs Gimgilitoun yey, biseinig Yowbad wanakətat, guntawtoun waseg; mo bukukineigs wəlov walbalab bawekeimiy.’”

⁶⁵⁻⁶⁶Kayapas, kapasal nuwan, iksigeb anakweim, ilana, “Bo kuliganes anilivan towen kalbaleb. Nag ivag sivinads gamag biyateles; babaw yəkids nitaliganes anilivan kalbaleb. Aməwan bitanuwakes mtowen?”

⁶⁷⁻⁶⁸Mo igusus Yeisuw magin, iwaweis nimes waseg. Igawa iwaweis, mwasanin ilansa, “Magat yəkoum Kelis, bukulivan məwana palopit yəkoum, kwavteg yagan kal iweim!”

Pita ikayan Yeisuw

(Mak 14:66-72; Luk 22:56-62; Yon 18:15-18, 25-27)

⁶⁹Pita igaw nises Kayapas wanven, wamatan nabunatum, tawtelein bunatum nətan inek, ilana, “Adok yəkoum soum Yeisuw mukunoys Galiliy nukumeis, ne?”

⁷⁰Ikayan mtowen, ilana, “Nag. Ta-akakin aveiyag nukulivan.” Babaw gamag ikatiliganes anilivan towen.

⁷¹Isineikik in wadunan ked waseg, nayuwein vin ikin, idibakes siney, ilana, “Taw towen veiyon gum-Nasalet towen Yeisuw.”

⁷²Ikayan vayuwein, ilana, “Nag bakakin gamag towen. Tamad!”

⁷³Igwə kakit, tasiyas nitomos wadadan ven iwekes Pita, ilansa, “Adok moundid yəkoum veiyon gum-Galiliy yəkoum, ne? Peinan aygam məwana aga-Galiliy.”

⁷⁴Ikavikun Pita, anilivan kalbaleb igegayous, itabudabod, ilana, “Nag; ta-bakakin taw towen. Tamad!” Mo igel kolkolek.

⁷⁵Pita inuway Yeisuw anilivan, “Nuwanaw bukupiyaveig sivatoun, mo beigel kolkolek.” Inuway livan towen, isunap, inoun in tanəban, ivəlam, singay igeg nanon.

Yeisuw iyətal wamatan Paylat

(Mak 15:1; Luk 23:1-2; Yon 18:28-32)

27 ¹Iyam-nen gəboug, illivans tasiyas tanuwgwes lun situwəvek sisiyas tammwayas, idokes kadiloka beiweis Yeisuw, beimat.

²Naman iyawanis vatul waseg, itokes, inawes Paylat waseg, guma-Lom towen sigabman avakaein.

Yudas ikanig

(Wotet 1:18-19)

³⁻⁴Yudas, mtowen tasilkodein Yeisuw, ikakina beiweis Yeisuw, ikanavin nanon, iyamen maysan towen, money silib sinawatoun, bisekes

kid tanuwgwes lun situwāvek sisiyas tammwayas, ilana, “Agusinap kalbaleb; bo asilkod gamag towen bwanabwein.”

Iweis tasiyas, ilansa, “Yakoum muwotet; yakamey nag.”

⁵Yudas ipiyev money towen, ilev in Yowbad wanbunatum wanuwan, inoun in, ikow vatul, iyawen kayon mo ikayagweg, imat.

⁶Tasiyas gog tanuwgwes lun situwāvek ikawes money towen, ilansa, “Towen maysan gamag buyāvin, awoum binek Yowbad namuloul. Amāwan bitavkakes money towen?”

⁷Mapuna iyamiyises tawtelein loutan napwepway, vāgan kid bidibwanis takanigs asibwabwal igaw bikankanigs ven towen waseg.

⁸Peinan money towen maysan gamag buyāvin, mapuna tadokes pwepway towen yagan “Gamag buyāvin pwapwayein.” Tut towen waseg pwepway yagan māwan.

⁹⁻¹⁰Ivāges māwan, mo ikamat livānen palopit towen Yelemay, peinan kweiboug ilivnek mamagina:

“Ikawes money silib sinawatoun, maysan mtowen min-Yisleil bo ikaliwages, mo iyamiyises tawtelein loutan napwepway. DaGuyaws bo ikaliwageig māwan.”

¹¹Inawes Yeisuw gabman waseg, itow wamatan. Mtownen gabman mo ikatigan, ilana, “Tabta yakoum min-Yudiy siking yakoum?”

Iw to Yeisuw ilana, “Māwan amlivan.”

¹²Tanuwgwes lun situwāveks sisiyas tammwayas mo iyateles Yeisuw; towen gog nag ikatimop ikkapay-wan.

¹³Iw to Paylat ilana, “Tab kwatiligen livāneim babaw illivans?”

¹⁴Towen gog nag kweitan livan iyamen; mapuna gabman towen bo isunasun nanon.

Ikaleiwag vāgan beiweisy Yeisuw

(Mak 15:6-15; Luk 23:13-25; Yon 18:39–19:16)

¹⁵Bweilim katanok katanok sagal towen waseg, gabman ansinap bilik tasiwun deil, am-towen sivines tababaw gamag. E, bilik mo bein wamnat.

¹⁶Teitan wādeil nises, butun avakaein peinan ansinap kalbaleb, yagan Yeisuw Balābas.

¹⁷Katikunouks gog gamag babaw, Paylat ikatugan, ilana, “Kal sivinamiy? Kwavtagis yagan mo balik bein wamnat. Tabta sivinamiy Yeisuw Balābas? o adok sivinamiy Yeisuw, mtowen idokes Kelis? Takaleiwag yakamiy.”

¹⁸Ikakin geg iyateles Yeisuw peinan ikamliwes.

¹⁹Tage mtowen Paylat issin wakaban vāgan bikaleiwag, Paylat nakwaw mo ikayeb natouwat inek, isek aygan nakwaw mamagina, “Awoum kuvag aveiyag taw towen waseg. Gamag towen bwanabwein. Boug akamikon towen silmanin; mapuna singay igeg nanoug.”

²⁰Bo itatays ninous gamag babaw, tasiyas tanuwgwes lun situwaweaks sisiyas tammwayas; ilansa, “Kwavtagis Balabas yagan; Yeisuw gog beimat.”

²¹Vayuwain gabman townen ikatugan; ilana, “Asteiy wadeil nisesus. Am-townen sivinamiy balik beiw wamnat?”

Ilansa, “Balabas.”

²²“Tage aveiyag bavag waseg Yeisuw? Mtownen idokes Kelis.”

Ilansa, “Kwatimet waklos.”

²³Iw to Paylat ilana, “Aveiyag wawun? Nag ivag ansinap kalbaleb.”

Iweis tasiyas, iwkuwaks, ilansa, “Kwatimet waklos!”

²⁴Paylat go ikakin ta-mawan binuwek, peinan kakita bisilamaws kawpwanaw; mapuna idow natouwaw, ilana, “Soup kumey, bawid namag.” Imey, iwid naman wamtes gamag babaw, ilana, “Yey nag baweiy gamag townen bwanabwein; e, takaleiwags yakamiy.”

²⁵Iweis tasiyas, ilansa, “Yakamey bakakaleiwag, bakaweiy; mawotet townen mapun bakalivet simayas nitimayas.”

²⁶Paylat mo ilik Balabas, inekes tasiyas. Ilivan gog Yeisuw beiweiy watul waseg, bisekes asibabaw bikatimates waklos.

Takannaviys isibawes Yeisuw

(Mak 15:16-20; Yon 19:2-3)

²⁷⁻²⁹Gabman nagamag tasiyas takannaviys itokes Yeisuw inawes wasibunatum bunavakaein. Takannaviys asibabaw ikatuyouns nimeis, inibwis Yeisuw anakweim, ivaskoumis anakweim avakaein bwabwel. Ikous, mo ikawes watul kulikoul mamagina douidiw, ikwanis isenas wakunun, magina anapay; nakaytuk isekes wanakatay; mo ikululs wamatan, ilansa, “Kalin nuwem yakoum, min-Yudiys siguyaw yakoum!” Isibawes igegayous.

³⁰Ikous, mo igusus won townen, ikawes nakaytuk iways wakunun.

³¹Isibawes ikous, mo inibwis maynawen kweim bwabwel, ivaskomis anakweim tatonen, itokes, inawes beiweiy waklos.

Iweiy Yeisuw waklos

(Mak 15:21-32; Luk 23:26-43; Yon 19:17-27)

³²Isekis Yeisuw anklos kaytan beikew, inounas. Waked mo ilivatus gum-Saylin yagan Saymon, ilansa, “Kukow anklos taw townen.”

³³E, Saymon ikokew Yeisuw anklos, inounas ineis koy yagan Golgot. (Takativin livan bein aga-Muyuw ‘Takanig busabwesan.’)

³⁴Bo isekes Yeisuw wayn son alun beimoum, vagan mamayuy biyenom; ikamkwen, ipiyev.

³⁵Pwapwat ikatikavates wanaman o wakaken; ikayagweg waklos. Takanaviys tasiyas iyakousis wotet townen, mo ikaliwages anakweim,

kalisiy bikawes, mamagina makava ilaves kweitan youd silmanin bikines kalisiy bikawes asikweim tatanok tatanok tasiyas.

³⁶Ikous, mo isinis, imtakavates.

³⁷Anklos wakunuwatan ileles nakalbaleb mamagina, “Mtowen Yeisuw, min-Yudiy siGuyaw.”

³⁸Siney tavveinaws asteiy iweiyis waklos, teitan wanakatay, tayuwein wankimaw.

³⁹⁻⁴⁰Tasiyas gog inounas makadewen ked isibawes, asilivan kalbaleb, ilansa, “Yakoum kudoki bukugulek Yowbad nabunatum, bukuwlulavaw gog yam kweitoun. Magat Yowbad Natun yak, kubus kum, kuymoveim.”

⁴¹⁻⁴³Mawan-vak tanuwgwes lun situwawek, sisiyas takatimkakeins kaleiwag, sisiyas tammwayas iyages Yeisuw, ivtokes livan, ilansa, “Bo ikatinabwes gamag mwasanin, nag kadilok bikatinob tatonen.” E, ilansa, “Mtowen kid Yisleil guyawun, kadiloka beibus waklos beim, mo bitaliganes anilivan. Peinan anilivan, ‘Asimounid Tamag Yowbad waseg; yey Yowbad Natun yey.’ Magat Yowbad sivanan gamag towen, kadiloka beim bikatinob.”

⁴⁴Mawan-vak tavveinaws tasiyas asteiy nikayagweges wasklos, iyages Yeisuw.

Yeisuw ikanig

(Mak 15:33-41; Luk 23:44-49; Yon 19:28-30)

⁴⁵Yanay idadub ven babaw ee... kalas itageg mo ikamnat vayuwein.

⁴⁶Igaw dadub ven, Yeisuw mo iwak, aygan avakaein, ilana, “Eli, Eli. Lamasabaktaniy.” (Takatavini go bein aga-Muyuw waseg: ‘Guna Yowbad! GunaYowbad! Aveiyag wawun nukulisaweig?’)

⁴⁷Gamag mwasanin nitatos wadadan iliganes, idokes Yeisuw ididow kid Ilaytiy.

⁴⁸Mapun teitan isawl in, ikow yotout isen wayn yayan wanuwan, ikaławt yotout, ibes wamatan kayal iyasel, isek Yeisuw, imoum.

⁴⁹Mwasinis gog ilivans, “Ga ises. Adok Ilaytiy beim bikatinob. Ga takines.”

⁵⁰Vayuwein Yeisuw mo iwak, aygan avakaein, kululuwan ilisow, bo ikanig.

⁵¹⁻⁵³Maynatan kweim nisilbwed palakakit, Yowbad wanbunatum, tut towen waseg mo iksigeb maynawen kweim; isilamaw wanakaew, iksigeb in watinow, ivag mwayney. Nik ivag, dakul itavis, alawag ikaliyowes, tadidumwals mwasinis nimmasis wakalugwes, tutan Yeisuw ikit vayuwein mo ikits tasiyas, inounas ineis Yelusalem, gamag babaw ikines.

⁵⁴Takalikay towen siney tasiyas takannaviys imtakavates Yeisuw, ikines nik, ikines youd siyas nikamats; aspwayat, ilansa, “Mounid Yowbad natun.”

⁵⁵⁻⁵⁶ Vinay mwasinis itowas tanbes. Natan vinen-Magdal yagan Meliy; nayuwein valeyin, manawen nitun tasiyas Yemes son Yosep; natounun Sebediy nakwav, ivag nitsiyas tawaw asteiy; sisiyas vinay mwasanin. Tasiyas kweiboug sisiy Yeisuw meinoy Galiliy nimeis, o yam babaw imtakavates. E, tasiyas itowas tanbes ikakins.

Yeisuw itakus

(Mak 15:42-47; Luk 23:50-56; Yon 19:38-42)

⁵⁷⁻⁵⁸ Yeisuw inavamul guyaw teitan yagan Yosep. Inaven Alimatiy. Yam townen kwayav waseg inek Paylat, initoug kaleivin Yeisuw bidibwen. Paylat itam.

⁵⁹⁻⁶⁰ Yosep ikow kaleivin Yeisuw, isumweil kweim pwapwakaw gimagim, isen wakalawag. Inakalawag takunumwan kweitan bo itateiys wanuwan dakul, bo imlavag Yosep alawagan tatonen. Isen kaleivin Yeisuw wanuwan, iyatipin dakul avakaen, ikatibwed wadon leg, mo inoun.

⁶¹ Vinay asteiy isiwas tanaban isinis ikikines, vinen-Magdal yagan Meliy son valeyin.

⁶²⁻⁶³ Yam townen ikatunags silmanin sagal. Iyam-nen mo sagal; tasiyas tanuwgwes lun situwawek sisiyas tasiyas Palisiy mo ikatuyouns inekes Paylat, ilansa, “Tamwey, kanuw anilivan tayyaweid townen, igaw mwamov, ilana, ‘Yam kweitoun mo bakit vayuwein.’

⁶⁴ “Kadiloka kukwaleiwag gamag mwasanin bintakavates alawagan kweitoun yam. Mata ge navamul bineis ivenos kaleivin, mo bidibakes gamag, bilansa, ‘Bo ikit vayuwein.’ Singay mo bikatimweisis yaweid, bikatidavis gamag babaw.”

⁶⁵ Iw to Paylat, ilana, “Takaymateins alawag nisesus wasigeis yakamiy. Kuneis kuwteles mawan beibwein.”

⁶⁶ Ineis tasiyas; youd mamagina kaybas ikawes, ipakus wawadon leg; takannaviys isekes siwotet imtakavates alawag townen.

Yeisuw itamanaw vayuwein

(Mak 16:1-8; Luk 24:1-12; Yon 20:1-10)

28 ¹ Yam tapwaloul-nen ikous, kadiyakusa beiyam kweivaw wik Sabat waseg, vinen-Magdal yagan Meliy son valeyin, asteiy ineis ilakwanes alawag.

² Nik ivag avakaen. Yowbad natakayob ibus walbalab im, iyatipin dakul, isen wadadan alawag, isin wakunuwatan.

³⁻⁴ Magin immteil mawana kavikawn, anakweim singaya pwapwakaw. Aspwayat takaymateins alawag, itatata wous, ikabalamats imasis.

⁵⁻⁷ Toge anelos idibakes vinay tasiyas, ilana, “Awoum beivag amipwayat. Akakina kunineivs Yeisuw, kudokes kid takanig. Nag.

Mtowen bo nein. Bo ikit maḡwana nilivnek. Kumeis, kukines nakabmasis makawan. Kunuwanaws, kuyum kuneis, kudibakes navamuls, kulansa, ‘Bo ikit kanig waseg.’ Mtowen bo bimgwayeimiy wa-Galiliy, yakamiy wankuyeim kuneis, mo bukunekes. Bo kuliganes agulivan?”

⁸Mapun ilisawes alawag, isawls, iyow nuwes, bogo imwaḡaws; isisawls kid bidibakes navamul.

⁹Isisawls ee... Yeisuw im ilivatus, ilana, “Kalin nuwag.”

Iweis tasiyas, iyousis kaken Yeisuw, magina bitapḡalouls waseg.

¹⁰Itapḡalouls, Yeisuw mo idibakes, ilana, “Awoum beivag amipḡayat. Kunounas, kunekes budag, kukines bineis Galiliy, mo bikineigs.”

Tamtakavateins alawag asilivan

¹¹Inounas tasiyas, tamtakavateins alawag mwasinis mo ineis ven towen Yelusalem, inekes tasiyas tanuwḡwes lun situḡavek, youda babaw ikamteles ikous.

¹²⁻¹³Katuyouns gog asibabaw sisiyas tammwayas, illivans ikous, mo isekes simoney avakaein takannaviy tasiyas, bital kid mites, ilansa, “Iḡaw kalisiy bikatiganeimiy, kuyaweids, kulivans, ‘Navamul bo imeis boug waseg, ivenos takanig towen; iḡaw kammasis yakamey.’

¹⁴“Kukin gog mitovek avakaein biligen, deisa bakalivan simey towen, bakasowm amisinap.”

¹⁵Itams tasiyas, ikawes maysan yaweid towen. Asilivan bo maḡwan; min-Yudiy mo iliganes. Iḡaw nagein tut towen min-Yudiy asilivan maḡwan.

Yeisuw isekes siwotet navamul

(Mak 16:14-18; Luk 24:36-49; Yon 20:19-23; Wotet 1:9-11)

¹⁶Navamul sinawatan tatanok inounas ineis Galiliy, ikatulags koy towen Yeisuw nilivnek.

¹⁷Ikatulags koy towen, ikines Yeisuw, ikululs wamatan; tage mwasanin nag isimounids bwein, ivag ninous akweiy.

¹⁸⁻²⁰Iw to Yeisuw, ilana, “Tamag bo isekeig gunakaleiwag babaw, walḡalab, watinow. Kuneis kumulis ven babaw gimgilis, kwatimlakes gunaked, kubaptayḡses Tamag Yowbad yagan waseg, Natun yey yagag waseg, o Kululuwan Town Bwanabwein yagan waseg; kwatimlakes bivnases kid agulivan towen nasekeimiy. Peinan yam babaw sigwey yakamiy bitasesus ee... iḡaw mo beikous ven watinow.”